

Ikalaata ilya kwanda ilya Paulo ku Bhakolinso Uwandilo

Umusundikwa uPaulo asimbile ikalaata ili ku Bhakilisiti abha mu Kolinso, ye yaamile nhaaya imanyisu mu nsi iya Wugiliiki. UPaulo alumbiliye mu nhaaya yiniyo umwanha weeka na meezi umutanda (Mbombo zya Bhasundikwa 18:1-18), abhantu abhinji bhawitishile uYeesu. Heelo uPaulo we asogola mu Kolinso, aBhakilisiti bhakhanda kugabhuhana mu lwitikho. Asimbile ikalaata ili kubhaavwa aBhakilisiti bhaala, inga bhimiile akhinza mu lwitikho.

Mwi kalaata ili, akupanga uwubhiibhi uwa kugabhuhana aBhakilisiti na kudalinhana ku zya lwitikho mu shibhanza. Akupanga she uMupepu uMufinjile akuutupa ivikunjilwa ivwinji nhaani anzu lugano, lwe lukutwavwa kumupuuta uMulangwa na kubha ni njendo inyinja mu lwitikho. Khabhili akubhakumbusya kuti kunongwa ye uKilisiti azyushile kufuma ku bhafwe, tumanyile kuti nitwe akwinza kutuzusya kubha twe bhumi winza.

Zye zili mu shitaabu ishi

UPaulo akubhalamukha aBhakolinso na kumupaala uMlungu.

Akupanga zye ayimvwizye izya kugabhunhana mu shibhanza.

Akubhasokha aBhakilisiti bhe bhali ni njendo izya wubhembe.

Imanyizyo ku bhe bhegiine

Imanyizyo izyi njendo zye zikwanziwa kubha nazyo ku bha.

Imanyizyo izya she aBhakilisiti bhakwanziwa kwimvwana.

Imanyizyo izya kuziyukha kufuma ku bhafwe

Ulubhaatikho lwa Paulo ulwa kuviyaatila ivibhanza

Indamukho

¹ Ine ne Paulo, ne uMlungu ambilishiye ku shigane shaakwe imbe ne musundikwa wa Yeesu Kilisiti. Ine peeka nu nholo wiitu mu lwitikho uSositeeni,

² tukubhasimbila imwe mubha mu shibhanza sha Mlungu, mwe muli mu nhaaya iya mu Kolinso, mwe uMlungu abhazelufwizye kunongwa ye mupatinhiine nu Yeesu Kilisiti. Mukhabhilishilwa kubha mwe bhafinjile bhaakwe,* peeka na bhantu bhonti abhi mbali zyonti bhe bhakumupuuta uYeesu Kilisiti, we wu Mwene waabho, kabhili wu Mwene wiitu.

³ Utaata wiitu uMlungu nu Mwene uYeesu Kilisiti bhabhalolelaje uwiila, na kubhapa uwutengaanu.

Impaalo zya Paulo kwa Mlungu

⁴ Inkumusalifwa uMlungu waani insiku zyonti kunongwa yiinyu, kunongwa ya wiila waakwe we abhapiiye kwi dala ilya Yeesu Kilisiti.

* **1:2 1:2** Abhafinjile bhaakwe Bhaazya **abhafinjile** mu **Wilulanyo nwa mazwi amajeni**.

⁵ Kunongwa ye mukhomanyiinywe nu Kilisiti, muwaajile uwudumbwe uwa vwonti, ku mazwi giinyu nu wumanyi wiinyu.

⁶ Kunongwa ye intumi ku zya Yeesu Kilisiti zyasimishiziizwe mukaasi yiinyu.

⁷ Ishi mutabhuliliilwe poope ishikunjilwa ngasheeka isha Mupepu uMufinjile, we mukuguulila kugalukha uMwene wiitu uYeesu Kilisiti.

⁸ UMulungu akubhagomwa kufishila kuwumalilishilo inga mutakhabhe ni nongwa isiku liila lye uMwene wiitu uYeesu Kilisiti akhayinza kulonga abhantu.

⁹ UMulungu musunde, uweene abhabhilishiiye imwe mubhe nu wapeeka nu Mwana waakwe uYeesu Kilisiti, uMwene wiitu.

Kuviitana mu shibhanza

¹⁰ Bhanholo bhaani mu lwitikho, inkubhasokha kwi taawa lya Mwene wiitu uYeesu Kilisiti, mwimvwanaje mwenti ku lyolyonti lye mukulonga. Kutakhabhe kuzilana, lyoli mubhe nu mwoyo weeka ni nsibho yeeka.

¹¹ Bhanholo bhaani, abhantu bhamu abha mu nyumba iya Kulowe bhambuziize kuti mutakwimvwana.

¹² Ishi, zye inkwanza kulonga zye zi ziizi: weeka weeka mukaasi yiinyu akulonga izyakwe, umo akuti, "Ine ne wa Paulo." Uwamwabho akuti, "Ine ne wa Apoolo." Uwamwabho akuti,

“Ine ne wa Keefa.”† †Wamwabho akuti, “Ine ne wa Kilisiti.”

¹³ Bhuli! UKilisiti agabhunhiine? Bhuli, uPaulo we áfuuye pa shikhobhenhanyo kunongwa yinyu? Bhuli, mwózeliilwe kwi taawa lya Paulo?

¹⁴ Inkumusalifwa uMlungu, kunongwa ye intámwoziize umuntu kukwinyu, lyoli uKilisipo nu Gaayo.

¹⁵ Pe shiniisho, ataliipo we angakhola kulonga kuti áyozeliilwe kwi taawa lyani.

¹⁶ Khabhili nábhóziize abhantu abha mu nyumba ya Siteefana. Bhanaabho bheene bhe nábhóziize, intamanyile kuti námwoziize umuntu uamwabho wowonti.

¹⁷ Kwe kuti, uKilisiti atánsonteleziize kwozya abhantu. Ansonteleziize kuvwinsya intumi iNyinza, sita kusubhila uwumanyi waani uwa kulonga akhinza, inga uwufwe wa Kilisiti pa shikhobhenhanyo watakhabhe sita makha.

Uwumanyi wa Mlungu

¹⁸ Kwe kuti intumi izya wufwe wa Kilisiti pa shikhobhenhanyo ku bhe bhakuteega bhakulola ngati shilema, lyoli kukwitu twe tukutulwa, intumi ziniizo makha ga Mlungu.

¹⁹ Kunongwa ye yisimbiilwe mu Wusimbe uWufinjile kuti,
“Inhayinanganya uwumanyi uwa bhe bhali nu wumanyi.

† **1:12 1:12** †Keefa Ili litaawa lyamwabho ilya Peeteli. Itaawa Peeteli ndongo ya Shiyunaani, itaawa Keefa ndongo ya Shialamayiki. Mu ndongo ziniizi kwe kuti *Lyalaawe*. Bhaazyá Mataayi 16:18.

Inhayizikhaana injeele zya bhe bhali ni njeele.”‡

20 Ishi, ali kwoshi we ali ni njeele? Ali kwoshi we mumanyizi wi ndajizyo? Ali kwoshi we amanyile nhaani kudalika mu nsiku izi? UMulungu alolesiize apazelu injeele izya mu nsi ini kubha wulema.

21 Kwe kuti anza she zili injeele zya Mulungu, abhantu bhatangakhola kumumanya mu njeele zyahho. Lyoli uMulungu ayiganile kubhatuula bhe bhakumwitikha kwi dala ilyi ntumi ye tukulumbiilila. Intumi yiniyo abhantu bhe bhatamumanyile uMulungu bhakuti ya shilema.

22 Kunongwa ye aBhayahuudi bhakwanza ivilolesyo, aBhayunaani bhakwanza injeele.

23 Heelo itwe, tukulumbiilila intumi zya Kilisiti we afuuye pa shikhobhenhanyo. Intumi zinizyo ku Bhayahuudi zikubhaviisya, na ku bhe te Bhayahuudi ntumi zya shilema.

24 Heelo ku bhe uMulungu abhabhilishiiye, aBhayahuudi awe aBhayunaani, uKilisiti makha ga Mulungu, khabhili we njeele zya Mulungu.

25 Inongwa zye abhantu bhakulola kuti wulema wa Mulungu, zyi njeele kushila injeele zya bhantu. Khabhili zye zikulolekha wutolwe wa Mulungu, zili na makha kushila amakha aga bhantu.

26 Ishi bhanholo bhaani mu lwitikho, kumbukhaji she mwamile we mukubhilishilwa nu Mulungu. Abhinji mukaasi yiinyu bhakhalolekhaga ngati bhatali ni njeele ku nsiibho zya bhantu. Khabhili abhinji matamile

‡ 1:19 1:19 Bhaazya Yeesaya 29:14.

nū waamulo, awe kupaapwa mu nyumba izya bhapiti.

²⁷ ƳMũlungu ábhasebhile abhantu bhe mu nsi bhakulolekha bhalema, inga abhasũpizye abhi njele. Khabhili uMũlungu ábhasebhile abhantu bhe bhakulolekha mu nsi bhatolwe, inga abhasũpizye abha makha.

²⁸ ƳMũlungu ábhasebhile abhantu abhapiina mu nsi, bhe bhakushoolanywa, bhe bhakulolekha ngati te bhantu, inga abhiisye ulushindikho abha lushindikho.

²⁹ Abhombile shiniisho inga umuntu wowonti aleshe kuyibaada pamiiso ga Mũlungu.

³⁰ Kwe kuti uMũlungu we abhapatinhanyiine nu Yeesu Kilisiti. Ƴweene amubhiishile uYeesu Kilisiti kubha njele zyitu, wanũyo uKilisiti we akuutupa uwugolosu, uwufinjile, nũ wutũlwe.

³¹ Anza she yisimbiilwe mu Wusimbe uWufinjile kuti,

“Umuntu wowonti we akuyibaada,
ayibaadaje kunongwa iya zye uMwene abhombile.”§

2

Kũmbĩlĩla intumi zya Yeesu Kilisiti

¹ Bhanholo bhaani mu lwitikho, we ninza kukwinyu kũmbĩlĩla intumi zya Mũlungu, intakhalũmbĩlĩlaga inga indoleshe kuti imanyile kũlonga akhinza, awe kuti indi ni njele nhaani.

§ 1:31 1:31 Bhaazya Yelemiya 9:23-24.

² Násibhiliye kuti intalonje akhantu akhanji kukwinyu, lyoli kulonga intumi zya Yeesu Kilisiti, na kufwa kwakwe pa shikhobhenhanyo.

³ We indi kukwinyu, náamile ne mutolwe, náamile ni lyoga, khabhili inhayingaga nhaani.

⁴ Akhabhalilo khe inhabhamanyizyaga na kulumbiilila, intakhalongaga amazwi kuti mwitische kunongwa yi njeele yaani, lyoli makha ga Mupepu uMufinjile gakhalolesyaga uwanalyoli.

⁵ Inhabhombaga liniilyo, kuti ulwitikho lwinyu lutasubhilaje insiibho zya bhantu, lyoli lubhe mu makha ga Mulungu.

Injeele kufuma kwa Mupepu uMufinjile

⁶ Ileelo tukumanyizya ku njeele ku bhantu bhe bhagomile mu lwitikho, ileelo injeele yiniyo te ya mu nsi ini, awe te ya bhapiti abha mu nsi ini bhe kummalilishilo bhakhayiyaga.

⁷ Itwe tukumanyizya izyi nsiibho ya Mulungu, zye zya kukwilu, khabhili zye zyafisishile. Umulungu abhatishile insiibho yiniyo we ashili kupela insi kunongwa ya wumwamu wiitu.

⁸ Ataliipo poope weeka mu bhapiti abha mu nsi ini we amanyile injeele yiniyo. Kunongwa ye inga bhamanyaje nhani bhatamukhomeleeye umwene uwa wumwamu.

⁹ Anza she yisimbiilwe mu Wusimbe uWufinjile kuti,

“Inongwa zye umuntu atalinjile kulola,
 poope kuziyimvwa,
 zye umuntu atalinjile poope kuzibhikha
 mu mwoyo waakwe,

ziniizyo zye uMũlungũ abhalinganizanyiiye
bhe bhamuganile.”*

10 Ileele itwe uMũlungũ atugubuliiye inongwa ziniizi kushilila kwa Mupepu uMufinjile. Kũnongwa ye uMupepu uMufinjile akũlola zyonti, poope zye zili kukwilu mwa Mũlungũ.

11 Ataliipo umuntu we angakhola kũmanya zye uwunji akũsiibha, lyoli zikũmanyikha mũ mwoyo wa wũula we akũsiibha mwene. She shiniisho, ataliipo we azimanyile zye uMũlungũ akũsiibha, lyoli uMupepu wa Mũlungũ.

12 Ishi itwe, tũtaposheleeye umupepu uwa mũ nsi umu, lyoli uMupepu we akufuma kwa Mũlungũ, inga atũmanyizyaje zye uMũlungũ atupiiye pabhũlo.

13 Pe shiniisho, tũtakulonga amazwi ge tũmanyiiye kũ njeele ya bhantũ, lyoli mazwi ge uMupepu uMufinjile atũmanyiziizye. Tukwilulanya inongwa izya Mupepu kũ bhe bhali nu Mupepu wũũũyo.

14 Pe umuntu we atali nu Mupepu uMufinjile, atangakhola kũposheela zye zikufuma kwa Mupepu wũũũyo. Kũkwakwe ziniizyo zya shilema, khabhili atangakhola kũzyaganya, kũnongwa ye umuntu akũzyaganya ziniizyo kũ makha ga Mupepu.

15 Lyoli umuntu we akũlongolwa nu Mupepu uMufinjile, wũũũyo akũzyaganya zyonti. Ileele abhantũ abhanji bhatangamwaganya uweene.

16 UWusimbe uWufinjile wakuti,
“Wu naanu we azimanyile insiibho zya Mwene?

* 2:9 2:9 Bhaazya Yeesaya 64:4.

Wu naanu we angamupanzya?"†
Heelo itwe tuli ni nsibho zye zikufuma kwa Kilisiti.

3

Ataliipo uwa kuyipaala mu mbombo ya Mulumu

¹ Bhanholo bhaani mu lwitikho, we namile kukwinyu intakhalongaga nimwe ngati bhantu bhe bhakulongolwa nu Mupepu uMufinjile, lyoli inhalongaga nimwe ngati bhantu bhe bhakulongolwa ni nsungukho izya mu nsi, khabhili anza bhaana abheela kamwitikha uKilisiti.

² Nabhamwensiizye izibha, te shaakulya ishigomu kunongwa ye mwashiili kugoma. Poope niishi mutangashikhola,

³ kunongwa ye niishi bhulo muli ni njendo izya mu nsi. Bhuli, umwone ni bho mukaasi yiinyu vwe mukujendeelela navwo, viniivwo vitakulolesya kuti niishi bhulo mukulongolwa ni nsungukho izya mabhili na kubha ni njendo izya mu nsi?

⁴ Inkulonga liniilyo kunongwa ye weeka akulonga kuti, "Ine ne wa Paulo." Uwamwabho akuti, "Ine ne wa Apoolo." Bhuli, ziniizyo zitakulolesya kuti, muli she mukubhomba ngati bhantu bhe bhatakamwitikha uMulumu?

⁵ Ishi uApoolo wu naanu? Woope uPaulo wu naanu? Itwe twe bhabhombi twe uMulumu atusonteleziizye kubhaavwa imwe kamwitikha.

† 2:16 2:16 Bhaazya Yeesaya 40:13.

Anza she weeka weeka wiitu apewiilwe na Mulungu.

⁶ Ine nawaalile imbeyu, uApoolo akhitiilila aminzi, ileelo uMulungu we akuyimezya na kuyikuzya.

⁷ Ishi we akawaala te wa kumusubhila awe we akwitiilila, lyoli uMulungu we akumezya na kukuzya imbeyu we wa kusubhila.

⁸ We akawaala na we akwitiilila bhonti bhalinganile, ileelo weeka weeka uMulungu akhayimuposheezya kufumilana na kuyikungula pa mbombo yaakwe.

⁹ Kwe kuti itwe twe bhabhomba mbombo bha Mulungu, niimwe mwe shiizi sha Mulungu, khabhili mwe nyumba yaakwe.

¹⁰ Ku wiila wa Mulungu we ampaiye, inzenjile ulwalo anzu muzenji umwinza, uwi njeele, ishi umuntu uwamwabho akuzenga pamwanya pa lwalo lunuulwo. Ieelo weeka weeka abhe amiso, she akuzenga pamwanya pa lwalo lunuulwo.

¹¹ Ataliipo umuntu we angakhola kuzenga ulwalo ulunji, lyoli luula lwe luzenziilwe, kwe kuti uYeesu Kilisiti.

¹² Ieelo pamwanya pa lwalo lunuulwo, umuntu angakhola kuzenga ku zahaabu, ku vijela, awe ku mawe agi nhela impiti, khabhili angakhola kuzenga ku makwi, ku matundu, na ku malaala.

¹³ Ieelo imbombo iya muntu wowonti yikhayilolekha kuti yili bhuliibhuli, kunongwa ye isiku liila iya kulongwa likhayiyibhikha apazelu imbombo yaakwe. Kwe kuti imbombo iya wowonti yikhayingwa uwinza waakwe ku mwoto uwa kulongwa.

14 Inga khe umuntu azenjile pa lwalo lunuulwo khatalungulila, umuntu wanuuyo akhayiposheela.

15 Lyoli inga imbombo ya muntu yalungulila, te akhaposheele, ileelo uweene wuuyo akhayituuwa, lyoli akhayibha ngati muntu we aapona mu mwoto.

16 Bhali, mutamanyile kuti imwe mwe Nyumba iMfinjile, khabhili uMupepu wa Mulungu akwikhala mukaasi yiinyu?

17 Inga umuntu ananganya iNyumba iMfinjile ya Mulungu, uMulungu akhayimanganya umuntu wanuuyo. Kunongwa ye inyumba ya Mulungu mfinjile, inyumba yiniyo mwe mwemwe.

18 Umuntu wowonti mukaasi yiinyu atakhayikhopele kuti ali ni njeele. Umuntu inga akuyilola kuti ali ni njeele mu nsi umu, ayibhiishe mulema inga azyaje injeele izya nalyoli.

19 Kunongwa ye injeele izya mu nsi, wulema pamiiso ga Mulungu. Anza she yisimbiilwe mu Wusimbe uWufinjile kuti, "uMulungu akubhalema abhi njeele mu wushevu waabho."*

20 Khabhili yisimbiilwe mu Wusimbe uWufinjile kuti, "uMwene azimanyile insibho izya bhi njeele kuti zitakhondeeye."†

21 Pe umuntu wowonti atakhayibaade kunongwa iya bhantu. Kunongwa ye ivintu vwonti vwinyu.

* **3:19 3:19** Bhaazya Ayuubu 5:12-13. † **3:20 3:20** Bhaazya Zabuuli 94:11.

22 Abhe wu Paulo, awe wu Apoolo, awe wu Keefa, awe vibhe vwa mu nsi, awe uwuumi, awe uwufwe, awe vwe viliipo ishi, awe vwe vikhayibha, vwonti vwinyu.

23 Ieelo imwe, mwe bhantu bha Kilisiti, wope ukilisiti wa Mulungu.

4

Imbombo zya bhasundikwa

1 Pe abhantu bhatubhaazye kuti itwe twe bhabhombi bha Kilisiti. Khabhili tupewiilwe imbombo iya kubhalumbiilila abhantu intumi zya Mulungu zye zyafisishile.

2 Ishi, wowonti we apewiilwe imbombo, akhondeeye abhe musunde.

3 Ieelo kukwani ine, intakusaajila inga nalongwa nimwe, awe kulongwa na bhalonganyi abha mu nsi. Khabhili ine intakuyilonga nuneene,

4 kunongwa ye intakulongwa lyolyonti mu mwoyo waani. Ieelo liniilyo litakumbikha imbe sita wubhiibhi, uMwene we akundonga.

5 Pe shiniisho, mutabhalongaje abhantu we khashili kufikha akhabhalilo khaakwe, lyoli muguilile kufishila pi siku lye uMwene akhayinza. Uweene we akhayivundula zyonti zye zifisishile mu khiisi, na kulolesya apazelu zye zili mu mooyo ga bhantu. Pe umuntu wowonti akhayiposheela impaalo ye yimakhondeeye kufuma kwa Mulungu.

6 Ishi, bhanholo bhaani mu lwitikho, amazwi gonti ganaago ge nalonga ku zya Apoolo na ku zyani, shikholanyo kukwinyu. Kufumilana

ni shikholanyo shaani ni sha Apoolo, inkwanza kuti mumanye indonjelo ye yikuti, “Zilemaje zye zisimbiilwe mu Wusimbe uWufinjile nyeeene.” Atakhabhe umuntu pakaasi yiinyu we akuyibaadila umuntu weeka na kumushoolanya uwunji.

⁷ Wu naanu we akubhiishile kuti ukhondeeye kushila uwunji? Khantu khooni khe uli nakho khe utapewiilwe na Mulumu? Khabhili inga wapewiilwe, khooni khe ukuyibaadila ngati utapewiilwe?

⁸ Ishi mukuyilola kuti mwikutile! Mwabha mwe bhadumbwe! Mwabha mwe bhamwene sita twetwe! Kwashi inga mubhanje nalyoli mwe bhamwene, kuti niitwe tutabhaale peeka niimwe!

⁹ Kwe kuti itwe tubhasundikwa, uMulumu atubhiishile kabha bhantu bha kushoolanywa. Ngati bhantu bhe bhalongiilwe kugogwa, kunongwa ye tubhishiilwe palukindi lwa bhantu bhonti, pilongolela pa bhakhabhizya na pa bhantu.

¹⁰ Itwe tukulolekha twe bhalema, kunongwa ye tukumabhombela uKilisiti, ileelo imwe mukuyilola mwe bhi njeele kunongwa ye mupatinhanyiinywe nu Kilisiti. Itwe tukulolekha twe bhatolwe, ileelo imwe mukuyilola mali na makha. Itwe bhakutushoolanya, ileelo imwe mukuyilola mwe bha lushindikho.

¹¹ Poope akhabhalilo ikha, tuli ni nzala ni shumilwa, tulaliliilwe. Tukukhomwa, khabhili tutali na wiikhalo.

12 Tukuyikungula kubhomba imbombo ni nyooobhe zytu taneetwe. We abhantu bhakutuliga, tukubhasaya, we bhakutuyimvwa, tukujimbi-ilila,

13 we bhakutwandila amalenga, tukubhaamula ku wutonsu. Poope niishi, tukulolekha ngati wukhandamanu uwa mu nsi, khabhili kwa muntu wowonti itwe twe maswaswa.

14 Intakubhasimbila amazwi ganaaga inga imbasuupizye, lyoli inkwanza kubhasokha mubhaana bhaani abhaganwa.

15 Poope she mali na bhamanyizyi ielufu ishumi mwa Yeesu Kilisiti, ileelo mutali na bhayise abhinji. Ine ne yise wiinyu kwi dala ilya kupatinhanywa nu Kilisiti, nabhapaapile kwi dala ilya kulumbiilila iNtumi iNyinza kukwinyu.

16 Pe shiniisho, inkubhalamba mwenyezyaje kukwani.

17 Kunongwa iya kubhaavwa, imusontelezi-izye uTiimoti, umwana waani umuganwa mu lwitikho, we musunde mu mbombo ya Mwene. Uweene atibhakumbusyaje she inkumalandata uKilisiti, na zye inkumanyizya poponti mu vibhanza vwonti.

18 Bhamu mukaasi yiinyu bhali na mabaado, bhakusiibha kuti te inhinze winza kukwinyu.

19 Ileelo inga umwene ayigana, inkusubhila kwinda kukwinyu nalubhilo. Panaapo pe inhayimanya amazwi ge bhakulonga bhanaabho bhe bhakuyibaada, te kumanya amazwi ganaago meene, lyoli kumanya na makha gaabho mu lwitikho.

20 Kwe kuti uwumwene wa Mulungu,* wutali mu mazwi, lyoli mu makha gaakwe.

21 Ishi, mukwanza imbombe lyoni? Ininze kukwinyu ni ndiisa? Awe ininze na mwoyo uwa lugano nu wutonsu?

5

Uwubhembu wutakwanziwa mu shibhanza

1 Inongwa zivwinshile kuti, kukwinyu kuli uwubhembu. Uwubhembu we wutafumiye naalumo poope ku bhe bhatakumwitikha uMulungu. Inimvwizye kuti umuntu akubhembukha na mushi wa yise waakwe.

2 Niimwe mukuyibaada! Mutakuswimiilila na kumwefwa umuntu we akubhomba ziniizyo mukaasi yiinyu!

3 Ine she poope indi ukutali niimwe, umwoyo waani wuli peeka niimwe. Khabhili ine imulongile umuntu we abhombile liniilyo, anza she nhani nabhomba bhanje indi kunukwo.

4 Akhabhalilo khe mukubhangaana kwi taawa lya Mwene wiitu uYeesu Kilisiti, umwoyo waani wakubha peeka niimwe, peeka na makha ga Mwene wiitu uYeesu.

5 Pe mumaleshe umuntu wanayo kwa Seetani, inga uwuntu waakwe uwi mbiibhi wufundwe, pe umwoyo waakwe wakhatulwe pi siku ilya kugalukha uMwene uYeesu.

6 Amabaado giinyu gatakondeeye. Bhuli, mutamanyile kuti uwusafu wushe bhulo, wakusafwa ishinyenya shonti?

* 4:20 4:20 *Uwumwene wa Mulungu* Bhaazya mu ***Wilulanyo uwa mazwi amajeni.***

7 Pe muyizelufwe, mwefwe uwusafu uwa khali, inga mabhe ngati shinyenya ishipwa she shitali nu wusafu. Nalyoli imwe she mali, kunongwa ye uMulongu amufumwizye uKil- isiti kubha mfinjile ngati Nyaana yi Ngoole iyi Pasaaka,* inga atutule.

8 Pe shiniisho, tuleshe kushimwa iPasaaka ku wusafu uwi maandi, kwe kuti uwubhiibhi ni mbiibhi. Lyoli tushimwaje ku makaati ge gatali nu wusafu,† we mwoyo umuzelu nu wa nalyoli.

9 Mwi kalaata lye nabhasimbiiye, nabhabhuiziye kuti, muleshe kubha nu wapeeka na bhabhembu.

10 Te kuti muleshe kubha nu wapeeka nziila na bhabhembu abha mu nsi umu, awe abhanavigane, abhabuda, na bhe bhakupuuta ivifwani vwa bhamulongu. Kunongwa ye kubhomba shiniisho mwakhondeeye kusaama mu nsi umu.

11 Lyoli nabhasimbiiye kuti: muleshe kubha nu wapeeka nu muntu we akuyitekha kuti nholo mu lwikho, ileelo mubhembu, awe wu navigane, awe akupuuta ivifwani iwa bhamulongu, awe mulumanya, awe mumwezi, awe mubuda. Umuntu anza wunuyo, matakhasheele poope kulya nawo.

* **5:7 5:7** INyaana yi Ngoole iyi Pasaaka ABhaisilaeli we bhashiili kusogola ku Miisili bhabhoolile ingoole. Ihanda lyakwe bhakhapakha mu nyiji inga ukhabhizya wa Mulungu we akushila kubhagoga abhalekhaje. Bhaazyu Kufuma 12:21-23. UYeesu akukholanywa ni nyaana yi ngoole yiniyo. Bhaazyu **iNyaana yi Ngoole** iwinza **iPasaaka** mu **Wilulanyo uwa mazwi amajeni**. † **5:8 5:8** Bhaazyu Kufuma 12:3-20; Nkambushizyo 16:3.

12 Bhuli, mbombo yaani kubhalonga bhe bhatitishile? Bhuli imwe mutakhondeeye kubhalonga bhe bhali mu shibhanza?

13 Bhanaabho bhe bhatitishile uMulungu wavyo we akhayibhalonga. Anza she uWusimbe uWufinjile wakuti, “Imwe mumubhinje umubhomba mbiibhi pakaasi yiinyu.”‡

6

Kusitaakana aBhakilisiti

1 Inga weeka mukaasi yiinyu alumiine nu wamwabho we ayitishile, khooni khe akusitaaka ku bhe bhatitishile? Bhuli, atakhondeeye kusitaaka ku bhamwabho bhe bhitishile kuti bhabhimvwaneyo?

2 Mutamanyile kuti bhe bhitishile bhe bhakhayiyilonga insi? Ishi, inga imwe mukhayiyilonga insi, mutakhondeeye kulonganya inongwa inyinsi nyinsi mukaasi yiinyu?

3 Bhuli, mutamanyile kuti tukhayibhalonga abhakhabhizya? Inga tukhayibhalonga abhakhabhizya, tukhondeeye kulonganya inongwa inyinsi nyinsi izyi nsiku zyonti.

4 Ishi, khooni we mulumiine mukutwala inongwa zyinyu ku bhantu bhe ishishanza shitakubhashindikha kubha bhalonganyi bhi nongwa?

5 Inkulonga shiniisho inga mulole insoni. Ishi, pakaasi yiinyu ataliipo uwi njele ngaweeka we angakhola kubhimvwaneyo bhe bhalumiine?

‡ 5:13 5:13 Bhaazyu Nkumbushizyo 17:7; 19:19; 21:21; 24:7.

6 fleelo imwe, umuntu akumusitaaka uwamwabho we ayitishile, khabhili ku bhalonganyi bhe bhatitishile!

7 Kusitaakana kunukwo kukolesya kuti mutoliilwe nziila! Bhali, te kwashi kumlekha umuntu akubhombela akhabhiibhi? Bhali, te kwashi kwitikha kufwulilwa ishuma shiinyu?

8 fleelo ishi imwe, mwe mukubhabhombela akhabhiibhi abhantu na kufwala ishuma shaabho, khabhili mukubhomba shiniisho ku bhamwinyu bhe bhitishile!

9 Mutamanyile kuti abhabhomba mbiibhi te bhakhinjile mu wumwene wa Mulungu? Mutayikhopelaje! Abhantu bhe bhakubhomba uwelengani, bhe bhakupuuta ivifwani vwa bhamulungu, abhabhembu, awe bhe bhakubhembukha abhasakhaala ku bhasakhaala,

10 abhiibha, abhanavigane, abhamwezi, abhindo, na bhabuda, bhanaabho bhonti te bhakhinjile mu wumwene wa Mulungu.

11 Bhamu mukaasi yiinyu she mwamile. fleelo ishi mwe bhazelufwe, mwabha mwe bhafinjile, na kubha mwe bhagolosu kwi taawa lya Mwene wiitu uYeesu Kilisiti, na mwa Mupepu wa Mulungu wiitu.

Kulekha uwubhembu

12 Bhamu mukaasi yiinyu bhakuti, "Ivintu vwonti vwitishiliilwe kukwani." fleelo te kuti ivintu vwonti vikhondeeye. Inkwitikha kuti ivintu vwonti vwitishiliilwe kukwani, ileelo intangakhola kubha ne mutumwa wa khantu khokhonti.

13 Bhamu bhakuti, “Ivwakulya viliipo kunongwa ya lwanda, lwope ulwanda luliipo kunongwa yi shaakulya.” Ileelo uMlungu akhayiviyazyza vwonti vibhili. Umabhili wa muntu wutapeliilwe kunongwa ya kubhomba uwubhembu, lyoli wapeliilwe kunongwa iya kamabhombela uMwene, wope uMwene we akusunga umabhili.

14 UMlungu amuzusyize uMwene uYeesu kufuma ku wufwe, akhayituzusya nitwe ku makha gaakwe.

15 Mutamanyile kuti amabhili giinyu mpaaswa ma mabhili wa Kilisiti? Bhali, ungakhola kwega impaaswa zya mabhili wa Kilisiti na kubhikha kubha mabhili weeka nu mubhembu? Ndaali, she zitangabha!

16 Umuntu wowonti we akubhembukha nu mubhembu akubha mabhili weeka nawo. Kunongwa ye yisimbiilwe mu Wusimbe uWufinjile kuti, “Bhabhili bhanaabho bhakubha mabhili weeka.”*

17 Ileelo umuntu wowonti we akhomanyi-nywe peeka nu Mwene, atibhe umwoyo weeka nawo.

18 Muefwaje nu wubhembu. Imbiibhi izinji zyonti, umuntu akubhomba kunzi ya mabhili waakwe, ileelo umuntu we akubhembukha, akuwabhombela imbiibhi umabhili waakwe.

19 Bhali, mutamanyile kuti, amabhili giinyu nyumba ya Mupepu uMufinjile we ali mukaasi yiinyu, we uMlungu abhapiiye? Amabhili te shuma shiinyu,

* 6:16 6:16 Bhaazya Wandilo 2:24.

20 kúnongwa ye mwátuliilwe kú wúpala úwúpiti. Shiniisho múmúpaalaje úMúlungu mú mabhili giinyu.

7

Insoshi kú zya bhe bhegiine

1 Ishi, inkúbhaamúla kú ziila zye mwánsimbiiye. Khinza úmúsakhaala kwikhala sita kwegá.

2 Íleelo kúnongwa íya kúyeefwa mú ndingo ízya wubhembu, úmúsakhaala abhanje nú múshi waakwe wúúyo, wóope úmwantanda abhanje nú múlume waakwe wúúyo.

3 Úmúlume akwílizyaje kwa múshi waakwe ízya kwegana, wóope úmúshi akwílizyaje kwa múlume waakwe kú zya kwegana.

4 Úmúshi atali nú waamúlo kú zya múbhili waakwe, lyoli úmúlume waakwe. Wóope úmúlume atali nú waamúlo kú zya múbhili waakwe, lyoli úmúshi waakwe.

5 Mutimanaje, lyoli inga mwitinhiine kúlekha kú khabhalilo khashe bhúulo kuti mupuute kwa Múlungu. Pílongolela, múgalúshilane winza, kuti úSeetani atakhabhalinje kú wubhembu we mwatolwa kuyidinda.

6 Ínkúlóngá amazwi ganaago kúnongwa ya kubhasunda, te kubhabijila.

7 Bhanje shígane shaani, naayiganile kuti abhantú bhonti bhabhe anziine.* Íleelo umuntu weeka weeka úMúlungu amupíiye ishíkunjilwa

* **7:7 7:7** *Bhabhe anziine* Ípa úPaulo akhayimanyisyaga kuti atéejile, khabhili shiniisho sháamile shíkunjilwa shaakwe.

shaakwe, weeka ishikunjilwa ishi, uwamwabho isho.

⁸ Ishi, inkubhabhuzya bhe bhashili kwegwa na bhafwile, kuti yaamile khinza bhasyale shiniisho anza she ine indi.

⁹ Heelo inga bhakupootwa kujimba, bheegaje, awe bhejelwaje kunongwa ye kwashi kubhomba shiniisho na kuti uyimbaje ni nsungukho iya mubhili.

¹⁰ Ku bhe bhegiine inkubhalajizya kuti umushi atamulekhaje umulume waakwe, indajizyo yiniini te yaani, lyoli ya Mwene uYeesu.†

¹¹ Heelo inga alekhana nawo, ategwaje ukunji, inga te shiniisho, ayimwane na mulume waakwe, na kugalushilana. Wope umulume, atakhamuleshe umushi waakwe.

¹² Ku bhantu abhanji inkubhabhuzya, ziniizi zyi nkulonga nsibho zyani te zya Mwene: kuti umusakhaala we ayitishile inga ayeejile umushi we atitishile, na mushi wanuuyo ayitikha kwikhala nawo, atakhamuleshe.

¹³ Wope amwantanda we ayitishile, inga ayejeliilwe na mulume we atitishile, na musakhaala wanuuyo ayitikha kwikhala nawo, atamulekhaje.

¹⁴ Kunongwa ye uMulungu akumuzelufwa umulume we atitishile, kwi dala ilya mushi waakwe. Wope umushi we atitishile, uMulungu akumuzelufwa kwi dala ilya mulume waakwe. Bhanje zitali shiniisho, nhani abhaana bhinyu bhakhandamanu, lyoli ishi bhaana bha Mulungu.

† 7:10 7:10 Bhaazya Mataayi 19:3-9; Maalika 10:2-12.

¹⁵ Heelo inga we atitishile akwanza kulekhana na we ayitishile, maleshe abhombe shiniisho. Ipo uMukilisiti wunuwu atakudindwa mu weegi wunuwu. Kunongwa ye uMulungu abhabhishiiye kuti mwikhalaje ku wutengaanu.

¹⁶ Kwe kuti utangamanya kuti umulume waakho angitikha kunongwa ya lwitikho lwakho. Niwe wumusakhaala we uyitishile, utangamanya kuti umushi waakho angitikha kunongwa ya lwitikho lwakho.

Uwikhalo we uMulungu alajiziize

¹⁷ Umuntu wowonti ayikhalaje anzu Mwene she amugabhiye, kabhili abhe anza she uMulungu amubhishiiye. Liniili lye ndajizyo yaani ku vibhanza vwonti.

¹⁸ Bhuli! Umuntu inga abhilishiliwe we atahiliwe,‡ aleshe kayibhikha ngati atahiliwe. Kabhili umuntu inga abhilishilwa we ashili kutahiiliwa, atakhatahiiliwe.

¹⁹ Kutahiiliwa awe sita kutahiiliwa, kutali nu winza, lyoli lye lyinza ku kalema indajizyo zya Mulungu.

²⁰ Shiniisho, umuntu wowonti abhe anza she amile we uMulungu akhamubhishilaga.§

‡ **7:18 7:18** *Atahiliwe* Ku Bhayahuudi inga umwana umusakhaala apaapwa, isiku ilya naane kufuma apaapwe bhakhabhoolaga ingoola iya mubhili kumwanya ku wasakhaala kulesya ulufingo lwa Mulungu lwe abhiishile nu Abulahaamu peeka ni shipaafi shaakwe shonti. Bhaazya **kutahiili** mu **Wilulanyo uwa mazwi amajeni.** § **7:20 7:20** *Shiniisho, umuntu wowonti abhe anza she amile we uMulungu akhamubhishilaga* Amazwi iga ku kuti umuntu abhe anza she uMulungu akwanza.

21 Bhuli! ƳMũlungũ ákubhilishiiye we uli mu wutumwa? Ƴtakhawũsaajile wũnũwo. Ieelo inga walyaga idala ilya kubha mũ wũsatulwe, jenda idala liniilyo.

22 Kũnongwa ye umuntu we áamile mutumwa we akubhilishilwa nũ Mwene, wũnũyo akubha mũsatulwe kwa Mwene. Wooke we áamile mũsatulwe we akubhilishilwa nũ Mwene, wũnũyo akubha mutumwa wa Kilisiti.

23 Mwátuliilwe kũ wũpala Ƴwũpiti, pe shiniisho mũtabhanje mwe bhatumwa bha bhantu.

24 Bhanholo bhaani mũ lwitikho, umuntu wowonti anza she ƳMũlungũ ámubhilishiiye, ayikhalaje anza she abhilishiliilwe.

Insoshi kũ bhe bhatejeliilwe na bhafwile

25 Ishi, kũ bhalindu bhe bhatajendile na bhasakhaala, intali ni ndajizyo kufuma kwa Mwene. Ieelo inkubhabhũzuya kũ nsibho zyani ine ne ku shisa sha Mũlungũ inhondeeye kũsũbhiilwa.

26 Kũnongwa ye kũli amayimba akhabhalilo ikha, inkulola kuti khinza umuntu ayiikhale anza she ali.

27 Bhuli, uyejiilwe? Ƴtanzaje kutabhukha. Bhuli, uteejile? Ƴtanzaje kwegu.

28 Ieelo inga weega, utabhombile mbiibhi, Ƴmulindu wooke inga ayeejelwa, atabhombile mbiibhi. Ieelo, bhanaabho inga bheegana bhakhayibha na mayimba aga mũ nsi. Niine injiganile kuti ziniizyo zitakhabhaaje imwe.

29 Bhanholo bhaani mũ lwitikho, inkulonga shiniishi kuti, akhabhalilo khe khasyalile khali

khashe kuti uKilisiti agalushe. Kufuma akhabhalilo ikha bhe bheejile bhaleshe kusibha abhashi bheene.

³⁰ Bhoope bhe bhakulila, bhabhe ngati bhatakulila, bhe bhakuseshela bhabhe ngati bhatakuseshela, bhe bhakukala bhabhe ngati bhatali ni vintu.

³¹ Khabhili bhe bhakuyiyimvwa ni vintu ivwa mu nsi umu, bhabhe ngati bhatakuyiyimvwa navwo, kwe kuti ivwa mu nsi vikushila.

³² Heelo inkwanza kuti muleshe kuyiyimvwa ku zya mu nsi. Umuntu we ateejile, akuyifumwa kubhomba imbombo ya Mwene, akusibha she angamukhondezya uMwene.

³³ Lyoli umuntu we ayeejile, akuyifumwa kubhomba izya mu nsi, akusibha she angamukhondezya umushi waakwe.

³⁴ Insiibho zyakwe zigabhunhiine pabhili. Umwantanda we atali nu mulume, nu mulindu we atejiliilwe bhakuyifumwa kubhomba imbombo ya Mwene inga bhabhe bhafinjile amabhili nu mwoyo. Heelo umwantanda we ali nu mulume, akuyifumwa kubhomba izya mu nsi, akusibha she angamukhondezya umulume waakwe.

³⁵ Amazwi ganaaga ge inkubhabhuzya te kuti inkwanza kubhadinda, lyoli inkwanza kubhaavwa. Inkwanza kuti mwikhalaje mwi dala lye likhondeeye, mamubhombelaje uMwene ku mwoyo wonti.

³⁶ Umuntu wowonti we akulola kuti te khinza kumulekha umulindu we amuzinjiiye, khabhili poope she amanha gaakwe aga kwe-

jelwa gashilile, nu muntu wunūyo akulola yikhondeeye bheegane, abhombaje shiniisho. Ipo we atabhombile imbiibhi.

³⁷ Ieelo umusakhaala inga ayaamula kuti atakwega sita kubijilwa nu muntu, inga angakhola kuyidinda, khinza atamwegaje umulindu wunūyo.

³⁸ Pe shiniisho, we akwega umulindu akubhomba khinza. Woope we atakwega, akubhomba akhinza nhaani.*

³⁹ Khabhili umwantanda we ayejeliilwe, ayikhalaje nu mulume waakwe, akhabhalilo khonti khe umulume waakwe mwumi. Ieelo inga umulume waakwe aafwa, ipo atibhe masatale kwejelwa nu muntu wowonti we amuganile, ileelo umuntu wunūyo abhe mulandati wa Mwene.

⁴⁰ Ieelo kwashi umufwile wunūyo asyale sita kwejelwa. Ziniizyo nsiibho zyani, inkusiibha kuti niine uMupepu wa Mulungu akundongola kulonga amazwi ganaago.

8

Ivintu vwe bhaputiye ku vifwani

* **7:38 7:36-38** Kwi dala ilyamwabho amasitaali iga 36-38 gakuti, Umuntu wowonti we akulola atibhe atabhomba khinza kuti atamwitishizye kwejelwa umwali we azinjiliilwe, khabhili inga amanha gaakwe aga kwejelwa gashilile, abhombaje anza she akwanza, abhaleshe bheegane, atibhe atabhombile mbiibhi. Inga umupaafi ayaamula wūyo kuti atamwitishizye kwejelwa umwali waakwe, amaleshe anza she ali, atibhe abhombile khinza. Umuntu we akumwitishizya kwegwa umwali waakwe we azinjiliilwe, akubhomba khinza. Ieelo we atakumwitishizya, akubhomba khinza kushila.

¹ Ishi inkulonga ku zya shaakulya she bhafumwizye ku lupuuto ulwa vifwani.* Imanyile mukulonga kuti, "Itwe twenti tuli nu wumanyi." Heelo uwumanyi wakubhabhikha abhantu kubha na mabaado. Lyoli ulugano lukubhagomwa abhantu mu lwitikho.

² Inga umuntu akuyilola kuti ali nu wumanyi wumo, wanuyo atali nu wumanyi anza she akwanziswa kumanya.

³ Heelo umuntu we amuganile uMlungu, wanuyo we amanyishile na Mlungu.

⁴ Ishi ku zya kulya ivwakulya vwe bhafumwizye ku lupuuto ulwa vifwani, tumanyile kuti ivifwani vwa bhamlungu te khantu mu nsi umu. Khabhili tumanyile kuti uMlungu ali weeka mwene.

⁵ Poope inga viliipo ivintu vwe bhakuti bha bhamlungu, yibhe kumwanya, awe paasi, khabhili poope inga bhaliipo abhamlungu abhinji na bhamwene abhinji,

⁶ Heelo kukwitu itwe, uMlungu ali weeka mwene, we wu Taata, we apelile ivintu vwonti.

Kunongwa yaakwe itwe tukwikhala. Khabhili aliipo uMwene weeka mwene, wu Yeesu Kilisiti, kufumilana na wuyo ivintu vwonti vwapeliilwe, nitwe twe bhuumi kufumilana na wuyo.

* **8:1 8:1** *Ishaakulya she bhafumwizye ku lupuuto ulwa vifwani* Mu nsiku zinizyo, inyama inyinji bhakhatalaga suuti kupuutila ku vifwani vwe bhakhapuutaga ngati wu Mlungu, pilongolela bhakhatwalaga kukazyu ku munaalo.

7 Heelo te bhantu bhonti bhe bhali nu wumanyi wunuuwu. Kunongwa ye bhaliipo bhamu bhe bhálubhiye kupuuta ivifwani vwa bhamulungu, niishi bhulo bhali ni nsibho kuti ivifwani vwa bhamulungu khantu kha nalyoli. We bhakulya vwe bhafumwizye ku bhamulungu bhanaabho, vikubhagalasya kusibha kuti bhakupuuta ku bhamulungu abha nalyoli. Kunongwa ye bhatagomile mu lwitikho, bhakuyilola mu mooyo gaabho kuti shikhandamanu.

8 Heelo ishaakulya shitakutubhiikha papiipi nu Mulungu. Pooppe inga twalekha kulya, tutakutezya akhantu, khabhili pooppe inga twalya, tutakwonjezya akhantu.

9 Mubhe amiiso, uwumanyi wiinyu wutabhazyaje bhe bhatagomile mu lwitikho bhabhombe imbiibhi.

10 Kunongwa ye umuntu we atagomile mu lwitikho, inga akulola iwe we uli nu wumanyi uli mu nyumba iya kupuuta ivifwani, ukulya ishaakulya, bhali, mu mwoyo waakwe te asibhe kuti wope akhondeeye kulya iwakulya vwe bhafumwizye ku lupuuto ulwa vifwani?

11 Kwi dala liniilyo, uwamwinyu we atagomile mu lwitikho, we uKilisiti amufwiliye, akuteega kufumilana nu wumanyi waakho.

12 Inga mukubhapvwa abhamwinyu bhe bhatagomile mu lwitikho kwi dala liniilyo, kuti bhagwe mu lwitikho, na kubhavwalazya amooyo gaabho, we mumubhombeeye imbiibhi uKilisiti.

13 Pe shiniisho, inga ishaakulya she inkulya, shikumubhiikha uwamwitu agwe mu lwitikho,

te indye inyama ngakheeka, inga uwamwitũ atakhagwile mu mbiibhi.

9

Kubhaavwa abhabhombi ivwa mubhili

¹ Bhũli, ine te ne musatulwe? Bhũli, ine te ne musundikwa? Bhũli, ine intámulolile uYeesu uMwene wiitũ? Bhũli, imwe mutamwitishile uMwene uYeesu kufumilana ni mbombo zye ine nábhombile?

² Poope inga abhantũ bhamu bhakũndola ngati te ne musundikwa, ileelo kukwinyu ine ne musundikwa. Ulwitikho lwinyu kwa Kilisiti, lusimishizyo lwe lukũlolesya uwusundikwa waani.

³ Abhantũ bhe bhakũndonga kuti te ne musundikwa, inkubhaamũla kuti:

⁴ bhũli, itwe tutakhondeeye kũposheela ivwakulya ni vwakũmwela kufumilana ni mbombo yiniini iya wusundikwa?

⁵ Bhũli, tutakhondeeye kũshũla nu mũshi we ayitishile, anza she bhakũbhomba uKeefa* na bhasundikwa abhanji, na bhansi bha Mwene uYeesu?

⁶ Awe bhũli, neene nũmwene nu Balinaaba twe tutakhondeeye kũposheela ivintu ivwa kutwavwa kwi dala ilya kũbhomba imbombo?

⁷ Musikaali bhũli we akũbhala kulwa uwũlũgu kwi dala ilya kũyisombela wũyo? Mulimi bhũli we atakulya amatunda ge akũwaala mu shiizi shaakwe isha mazabiibu? Awe mudiimi

* 9:5 9:5 *uKeefa* wu Peeteli.

bhuli we atakumwela izibha kufuma mu vwuwa vwakwe?

⁸ Bhuli, inkulonga amazwi ganaaga ku nsibho zya bhantu? Bhuli, indajizyo zya Moose† zitakulonga ziniizyo?

⁹ Kunongwa ye yisimbiilwe mu ndajizyo zya Moose kuti, “Ing’ombe we yikukhanya ingano kupukusula insanga, utayipinyaje kwi lomu.”‡§Bhuli, mu mazwi ganaaga kwe kuti uMulungu akusibha izyi ng’ombe nyeene?

¹⁰ Bhuli, atakhatu sibhililaga twetwe we akhalongaga ziniizyo? She zili! Uwusimbe wunawo wasimbiilwe kunongwa yitu! Kunongwa ye we akulima, na we akusezya, bhonti bhabhili bhakhondeeye kusubhila kuposheela iviyabho.

¹¹ Itwe twalumbiliye iNtumi iNyinza kukwinyu, anzu muntu we akawaala imbeyu. Bhuli, likubha lizwi lipiti kuposheela ivintu vwinyu kutwawwa anzu muntu we akuvuna?

¹² Inga bhamu bhakhondeeye kuposheela ivintu viniivwo kufuma kukwinyu, bhuli, itwe tutakhondeeye kushila bhanaabho?

Ileelo itwe tutisiize vwe takhondeeye kubhombelwa nimwe, lyoli tujimbiliye mu zyonti inga tutakhabhadinde abhantu kwitikha iNtumi iNyinza izya Kilisiti.

† **9:8 9:8** *Indajizyo zya Moose* Izi ndajizyo zye uMulungu abhapiye aBhaisilaeli mu shilozu kushilila kwa Moose. Bhaazya u**Moose** mu **Wilulanyo uwa mazwi amajeni.** ‡ **9:9**

9:9 Bhaazya Nkumbushizyo 25:4. § **9:9 9:9** *Ing’ombe we yikukhanya ingano kupukusula insanga, utayipinyaje kwi lomu* ABhaisilaeli bhakhapukusulilaga ingano ing’ombe.

13 Bhuli, mutamanyile kuti bhe bhakubhomba imbombo mu Nyumba iMfinjile,* bhakulya ishaakulya shaabho kufuma mu vwe bhafumwizye pa shigemo?† Kwe kuti bhe bhakubhomba imbombo iya kufunwa imfinjile pa shigemo, bhakuposheela kufuma mu mfinjile ziniizyo.

14 Umwene uYeesu woope shiniisho alajiziizye kuti bhe bhakulumbiilila iNtumi iNyinza, bhalyanje kufumilana ni mbombo yiniizyo.‡

15 Ileelo ine, intabhombeeye ngalyeka mu ganaago ge inhondeeye kubhombelwa. Khabhili intakusimba ganaaga inga imbombelwe ziniizyo. Kukwani ine kwashi kufwa na kuti umuntu wowonti andinde kuyibaada kwani kunuuku.

16 Kunongwa ye we inkulumbiilila iNtumi iNyinza, intakhondeeye kuyibaada, kunongwa ye uMulungu andajiziizye kuti indumbililaje. Khabhili insheleeye inga intalumbiilila iNtumi iNyinza!

17 Inga nabhombaga imbombo yiniini ku shigane shaani, nhani nasubhiye kuposheela, ileelo ishi inkubhomba kunongwa ye inkwanziwa kuyibhomba. Kwe kuti imbombo ini inkuyibhomba ku shigane sha Mulungu.

18 Ishi inhayiposheela khantu khooni? Kuposheela kwani kwe ku kuuku: kulumbiilila iNtumi iNyinza sita kuposheela, awe sita kwisya vwe inhondeeye kuposheela kunongwa iya

* 9:13 9:13 *INyumba iMfinjile* Bhaazya mu ***Wilulanyo uwa mazwi amajeni.*** † 9:13 9:13 Bhaazya Bhalaawi 6:16, 26.

‡ 9:14 9:14 Bhaazya Mataayi 10:10; Luuka 10:7-8.

kulumbiilila.

Zye abhasundikwa bhakhondeeye kubhomba

¹⁹ She poope ne musatulwe, kabhili te ne mutumwa wa muntu wowonti, injibhiishile kubha ne mutumwa wa bhantu bhonti, inga imbajeeleze abhantu abhinji bhamwitishe uKilisiti.

²⁰ Ku Bhayahuudi, namile ngati ne Muyahuudi, inga imbajeeleze aBhayahuudi bhamwitishe uKilisiti. Kwe kuti ku bhaala bhe bhakulandata indajizyo zya Moose, namile ngati ne mulandati wi ndajizyo, poope she ine intamile ne mutumwa wi ndajizyo, inga imbajeeleze bhe bhakulandata indajizyo bhamwitishe uKilisiti.

²¹ Ku bhe bhatazimanyile indajizyo, namile ngati muntu we atazimanyile indajizyo inga imbajeeleze bhamwitishe uKilisiti. Te kuti inkwikhala sita kulandata indajizyo zya Mulungu, ndaali, inkuzilandata kunongwa ye inkulongolwa ni ndajizyo zya Kilisiti.

²² Ku bhe bhatagomile mu lwitikho, namile ngati muntu we atagomile mu lwitikho, inga imbajeeleze bhamwitishe uKilisiti. Nabhombile zyonti ku bhantu bhonti, inga imbaposhe bhamu.

²³ Inkubhomba ganaaga gonti kunongwa yi Ntumi iNyinza inga insangaanile na bhanji insayo zyakwe.

²⁴ Mutamanyile kuti abhantu bhe bhakufuyana kushimbila, bhonti bhakushimbila, ileelo weeka mwene we akuposheela ishipambwi isha kufuuya? Pe shiniisho mushimbilaje nhaani

mu mafuuyano inga niimwe mukhaposheelee ishipambwi.

²⁵ Bhe bhakufuuyana mu mafuuyano, bhakubhomba ku makha kuyilubhizya kulingaanya amabhili gaabho kunongwa iya kufuuyana. Bhakubhomba ziniizyo inga bhaposheelee ishipambwi isha khabhalilo khashe bhũlo. fleelo itwe tukuyilubhizya inga tukhaposheelee ishipambwi isha wiila na wiila. ²⁶ Pe shiniisho, niine intakushimbila ngati muntu we akushimbila sita lubhaatikho, kabhili intakulwa ngati muntu we akusamba inguumu kukhoma impepu.

²⁷ Lyoli inkwuyimvwa na kwulubhizya umubhili waani kujimbiilila inga we nalumbiilila abhantu abhanji iNtumi iNyinza, ine uMulungu atakhanhaane.

10

Insoshi ku zya vifwani ivwa bhamulungu

¹ Bhanholo bhaani mu lwitikho, inkwanza mukumbushe kuti abhamaama bhiti bhonti we bhakushila mu shilozu, bhonti bhálongoliilwe ni bhingo,* kabhili bhonti bháshilile pakaasi pa sumbi.

² We bhalongolwa ni bhingo na kushila mwa sumbi, yámile ngati bhózeliilwe kubha bhalandati bha Moose.†

³ Bhonti bháliiye ishaakulya shishiila she sháfumile kumwanya.‡

* **10:1 10:1** Bhaazya Kufuma 13:21-22. † **10:2 10:2** Bhaazya Kufuma 14:22-29. ‡ **10:3 10:3** Bhaazya Kufuma 16:35.

4 Khabhili bhonti bhámweleeye aminzi gaala ge uMũlungu ábhapiiye kwi dala ilya mayele, kufuma mwi lyalaawe. Ilyalaawe liniilyo áamile wu Kilisiti we akhajendaga peeka nabho.

5 Heelo abhinji mu bhanaabho, bhakhabhombaga zye zitakumukhondezya uMũlungu. Pe akhabhayazy, amavimba gaabho gásaatile mu shilozu.

6 Shiniisho, ziniizyo zyáfumiiye kubha shikholanyo kukwitu. Zikutusokha kuti tutasungukhaje kubhomba imbiibhi anza bheene she bhakhasungukhaga.

7 Mutapuutaje ivifwani vwa bhamũlungu anza bhamu mu bhanaabho she bhakhabhombaga. Anza she yisimbiilwe mu Wusimbe uWufinjile kuti, “Abhantu bhíkhaaye paasi, bhakhalya na kumwela, pilongolela bhakhimiilila kuvina ishimbembu.”§

8 Khabhili tutabhombaje uwubhembu anza bhamu mu bhaala she bhakhabhombaga. Pe uMũlungu akhabhayazy abhantu ielufu amashumi gabhili na zitatu (23,000) kwi siku lyeka.*

9 Khabhili tutamulingaje uMwene anza bhamu she bhámulinjile kwi dala ilya kubhomba imbiibhi, bhakhalumwa ni njokha, bhakhafwa.†

10 Mutayibhunaje anza bhamu she bhakhayibhunaga, ukhabhizya umugoji akhabhayazy.‡

11 Ishi ziniizyo zyonti zye zyábhaajile abheene

§ 10:7 10:7 Bhaazy Kufuma 32:6. * 10:8 10:8 Bhaazy Mbaazyo 25:1-9. † 10:9 10:9 Bhaazy Mbaazyo 21:5-6. ‡ 10:10 10:10 Bhaazy Mbaazyo 16:41-46.

inga zibhe shikholanyo ku bhanji, zyasimbiilwe inga zibhe nsoshi kukwitu itwe twe tukwikhala mu nsiku izi izya kumpeleela.

12 Pe shiniisho we akuyilola kuti ayimiliye akhinza mu lwitikho, ayenyaaje inga atakhaagwe.

13 Indingo zye zibhaajile, zya mwata ku bhantu. Umulungu musunde, uweene te ayitishize mulingwe kushila amakha giinyu. Heelo peeka ni ndingo, uweene atiibhape amakha aga kujimbiilila ni dala ilya kufumila inga mubhe mu wutengaanu.

Insoshi ku zyi Shaakulya sha Mwene

14 Shiniisho bhaganwa bhaani, zishimbilaje impuuto izya vifwani vwa bhamulungu!

15 Inkulonga nimwe anza bhantu bhe bhali ni njele, mwamulaje muneemwe izi zye inkulonga.

16 Bhali, we tukumusalifwa uMulungu ku shikoopa ishi divaayi she tukumwelela mu khabhalilo akhi Shaakulya sha Mwene, tutakubha mu wapeeka mwi bhanda lya Kilisiti? Bhali, we tukumensula ikaati na kulya, tutakubha mu wapeeka mu mubhili wa Kilisiti?

17 Kwe kuti ikaati lili lyeka, itwe twe twe bhinji, tuli mubhili weeka, kunongwa ye twenti tukusanganila ikaati lyeka.

18 Bheanye abhantu abha mu Isilaeli. Bhali, bhonti bhaala bhe bhakulya vwe bhaputiye pa shigemo, bhatakubha mu wapeeka nula we bhakumufumwizya?§

§ 10:18 10:18 Bhaazya Bhalaawi 7:6-10, 14, 15.

19 Ishi inkwanza kulonga lyoni? Kuti, ishaakulya she bhafumwizye ku lupuuto ulwa vifwani ivwa bhamulungu shinza kushila ishaakulya she bhatafumwizye? Awe viniivwo ivifwani ivwa bhamulungu khantu kha nalyoli kushila ishifwani?

20 She zitali! Imfinjile zye bhafumwizye bhe bhatakumwitikha uMulungu, bhakufumwa ku maseetani te kwa Mulungu. Ine intayiganile kuti imwe mubhe nu wupeeka na maseetani.

21 Yitakwanziwa kuti mumwelaje mu shikoopa sha Mwene, khabhili mumwelaje mu shikoopa isha maseetani. Mutakwanziwa kulya iShaakulya sha Mwene, khabhili mulye ishaakulya isha maseetani.

22 Bhuli, tukwanza kuzambulanya umwone wa Mwene? Bhuli tuli na makha kushila uweene?

Zye tukubhomba zimupaalaje uMulungu

23 Bhamu bhakuti, "Ivintu vwonti vwitishiliilwe." fleelo te kuti ivintu vwonti vikhondeeye. Khabhili bhakuti, "Ivintu vwonti vwitishiliilwe." fleelo ine inkuti, te vwonti vikwawwa.

24 Umuntu atasajilaje zye zikumwavwa wuuyo, lyoli asajilaje zye zikubhaavwa abhanji.

25 Inyama zyonti zye bhakukazya mu manaalo mulyanje sita kubhuziilizya-bhuziilizya, inga mutayimbaje mu nsibho zinyu.

26 Kunongwa ye mu Wusimbe uWufinjile yisimbiilwe kuti, "Insi peeka ni vintu vwonti vwe vili mumwo, vwa Mwene."*

* 10:26 10:26 Bhaazya Zabuuli 24:1.

27 Umuntu we atitishile inga akubhalanjila kulya, niimwe mwitikha kubhala, ivintu vwonti vwe akubhapa, malyanje sita kubhuziilizya-bhuziilizya kuti vifumile kwoshi, inga mutayimbaje ma nsiibho zyinyu.

28 Heelo inga umuntu abhabhuzya kuti, "Ishaakulya ishi bhaputiye ku vifwani vwa bhamulungu," pe mutalyanje kunongwa ya muntu wanuyo we abhabhuziize, na kunongwa yi nsiibho ma mooyo.

29 Inkulonga te ka nsiibho zyinyu, lyoli inkulonga insiibho zya muntu we abhabhuziize. Kwe kuti, khooni khe uwusatulwe waani wusubhile insiibho zya muntu uwunji?

30 Inga ine inkulya ishaakulya shiniisho ku nsalifwo, khooni inkuligwa kunongwa iya vintu vwe inkumusalifwa uMulongu?

31 Pe shoshonti she mwalya, awe kumwela, awe shoshonti ishinji she makubhomba, vwonti viniivwo vibhombekhaje ku wumwamu wa Mulungu.

32 Mutabhapuvwaje abhayahuudi awe abhayunaani awe ishibhanza sha Mulungu.

33 Mubhe anziine. Kunongwa ye inkulinga kubhakhondezya abhantu bhonti ka madala gonti. Intakwanza kuyikhondezya naneene, lyoli kubhakhondezya bhonti, inga bhawaaje uwuposhi.

11

1 Shiniisho mwenyezyaje kukwani, anza she niine inkwenyezya kwa Kilisiti.

Kugubishila kwi twe mu khabhalilo akha luputo

² Inkubhapaala kunongwa ye mukunkumbukha ku zyonti, na kulema imanyizyo zye namanyiiye na kubhamanyizya.

³ Heelo inkwanza mumanye kuti itwe lya musakhaala wowonti we ayitishile wu Kilisiti, itwe lya mwantanda mulume, itwe lya Kilisiti wu Mlungu.

⁴ Umusakhaala wowonti we akupuuta awe kufumwa uwukuwi, kumo agubishiye kwi twe lyakwe, akumusupiza wu Kilisiti we litwe lyakwe.

⁵ Umwantanda wope we akupuuta awe kufumwa uwukuwi sita kupinya ishambaala kwi twe lyakwe, akumusupiza mulume we litwe lyakwe, kunongwa ye akubha ngati mwantanda we asyenguuye insisi.

⁶ Umwantanda we akulola uwukhata kugubishila kwi twe, pe asyengule insisi zyakwe! Heelo inga nsoni kwa mwantanda kusyengulwa insisi zyakwe, pe apinyaje ishambaala kwi twe lyakwe.

⁷ Yitakhondeeye kwa musakhaala kugubishila kwi twe, kunongwa ye uweene shikholanyo sha Mlungu, kabhili akulolesya uwumwamu wa Mlungu. Heelo umwantanda wumwamu wa musakhaala.

⁸ Kunongwa ye uMlungu atamupelile umusakhaala kufuma kwa mwantanda, lyoli amupelile umwantanda kufuma kwa musakhaala.

⁹ Kabhili uMlungu atamupelile

umusakhaala kunongwa ya mwantanda, lyoli amupelile umwantanda kunongwa ya musakhaala.

¹⁰ Kunongwa yiniini, na kunongwa ya bhakhabhizya bhe bhakutendeela, umwantanda akhondeeye kupinya ishitambaala kwi twe kulolesya uwaamulo we wali pamwanya yaakwe.

¹¹ Heelo kunongwa ye tukhományiinywe nu Mwene, umwantanda akumusubhila umusakhaala, wope umusakhaala akumusubhila umwantanda.

¹² Anza she umwantanda apeliilwe kufuma kwa musakhaala, wope umusakhaala akupaapwa nu mwantanda. Heelo ivintu vwonti vikufuma kwa Mulungu.

¹³ Ishi mwamule muneemwe, bhali yikhondeeye umwantanda kupuuta kwa Mulungu sita kupinya ishitambaala kwi twe?

¹⁴ Poope, amabhili giigo gakulolesya kuti umusakhaala kubha ni nsisi intali nsoni kukwakwe!

¹⁵ Heelo umwantanda kubha ni nsisi intali litogo kukwakwe.* Kunongwa ye uMulungu amupiiye umwantanda kubha ni nsisi intali inga zimugubishilaje kwi twe.

¹⁶ Heelo inga umuntu akwanza kudalinhana ku liniili, amanye kuti itwe awe ivibhanza vwa Mulungu tutali ni mwata ye mukulwila iya wulingaanu uwa musakhaala nu mwantanda.

Uubhaatikho ulwa Shaakulya sha Mwene

* **11:15 11:15** Kubha ni nsisi intali litogo kukwakwe Akhabhalilo khanaakho yamile mwata abhantanda kukuzya insisi.

17 Ishi ku ziizi zye inkwanza kubhalajizya, intakubhapaala. Kunongwa ye we mubhunganile mutakubhomba zye nyinza, lyoli mukubhomba zye zitakwavwa.

18 Inimvwizye kuti we mukubhangaana kupuuta ma shibhanza mutakwimvvana. Mu ziniizyo zye inimvwizye inkwitikha kuti zimo zya nalyoli.

19 Kunongwa ye yikuti uwuleganu wabhe mukaasi yiinyu, inga bhe bhitishiliilwe na Mulungu bhaloleshe.

20 Nalyoli mukubhangaana, ileelo te kulya iShaakulya sha Mwene!

21 Kunongwa ye we mukulya, weeka weeka wiinyu akulya ishaakulya shaakwe sita kugulila abhamwabho. Liniilyo likubhiikha umo kubha ni nzala, uwamwabho kukholwa.

22 Bhuli, mutali na pa kulila na kumwela mu nhaaya zyinyu? Khooni khe mukushoolanya ishibhanza sha Mulungu na kubhasupizya bhe bhatali nakho naakhamu? Imbabhuzye izyoni? Bhuli imbapaale ku liniili? Ndaali! Intangabhapaala.

23 Inkulonga shiniisho kunongwa ye ine naposheleeye kwa Mwene imanyizyo zye nabhalesheeye imwe, kuti uMwene uYeesu uwusiku wuula we alonjeleliilwe, akheega ikaati.

24 We amusalifwa uMulungu, akhamensula ikaati akhati, "Uwu we mubhili waani we inkuwufumwa kunongwa yiinyu. Mubhombaje shiniishi kunkumbukha ine."

25 We bhaalya akhabhomba shishiila, akheega

ishikooa ishi divaayi† akhati, “Ishikooa ishi sha lufingo ulupwa‡ lwe lukubhombekha mwi bhanda lyani. We mukmwela, mubhombaje shiniisho kankumbukha.”

26 Kunongwa ye we mukulya ikaati ili na kumwela ishikooa ishi, mukuvwinsya kufwa kwa Mwene kufishila akhabhalilo khe akhayinza.

27 Umuntu wowonti we akulya ikaati liniilyo awe kumwela ishikooa shiniisho she yitakhondeeye, atibhe abhombile mbiibhi, kunongwa ye atibhe asholanyiinye umubhili ni bhanda lya Mwene.

28 Pe shiniisho umuntu wowonti ayibhuzilizye wuuyo suuti, pe alye ikaati na kumwela ishikooa shiniisho.

29 Kunongwa ye umuntu wowonti we akulya na kumwelela sita kumanya zye zikhondeeye mu wupeeka na mubhili wa Mwene, akuyileetela kulongwa wuuyo.

30 Ye nongwa abhinji mukaasi yiinyu bhatolwe, bhamu bhabhinu, khabhili bhamu bhafuuye.

31 Heelo bhanje twayibhuzilizyaga taneetwe, nhani tataamile tulongwe.

32 Poope shiniisho, we tukulongwa na Mwene, tukusundwa inga tutakhalongwe peeka na bha mu nsi.

33 Pe shiniisho, bhanholo bhaani mu lwitikho, we mukubhangaana kulya iShaakulya sha Mwene, mugulilanaje.

† 11:25 11:25 *Idivaayi* Bhaazy mu **Wilulanyo uwa mazwi amajeni.** ‡ 11:25 11:25 *Ulufingo ulupwa* Bhaazy **ulufingo** mu **Wilulanyo uwa mazwi amajeni.**

34 Inga umuntu ali ni nzala, alyanje kukwakwe, inga we makubhangaana matakhaazye kulongwa. Niine we ninza inhayibhabhuuzya akhinza zye zisyaliliye.

12

Ivikunjilwa vwa Mupepu uMufinjile

1 Ishi bhanholo bhaani ma lwitikho, ka zya vikunjilwa kufuma kwa Mupepu uMufinjile inkwanza kuti mumanye akhinza.

2 Mumanyile kuti we mutamumanyile uMulungu, mwakhopeliilwe na kulongolwa kupuuta ivifwani iwva bhamulungu bhe bhatakulonga.

3 Pe shiniisho inkwanza mumanye kuti, ataliipo umuntu we akulongolwa nu Mupepu wa Mulungu we angakhola kulonga kuti, "UYeesu agunwe." Khabhili ataliipo umuntu we angakhola kulonga kuti, "UYeesu wa Mwene," inga atakulongolwa nu Mupepu uMufinjile.

4 Kuli nu wuleganu uwa vikunjilwa, ileelo uMupepu uMufinjile we akugabhanya ali weeka.

5 Khabhili kuli uwuleganu uwa kumubhombela uMwene, ileelo uMwene we tukumubhombela ali weeka.

6 Khabhili kuli uwuleganu uwa kubhomba imbombo, ileelo uMulungu ali weeka we akubhomba imbombo zyonti ka bhantu bhonti.

7 Umuntu weeka weeka uMupepu uMufinjile akuumupa ishikunjilwa inga abhavwaje abhantu bhonti.

8 Kunongwa ye uMupepu uMufinjile akuumupa weeka izwi ilyi njeele, uwamwabho

akupeelwa izwi ilya wumanyi nu Mupepu wunwuyoy.

⁹ UMupepu wunwuyoy, akuumupa weeka kubha na lwitikho, uwamwabho akuumupa ishikunjilwa isha kponia,

¹⁰ uwamwabho ishikunjilwa isha kubhomba amayeke, uwamwabho kufumwa uwukuwi, uwamwabho kumanya uwuleganu uwa Mupepu wa Mlungu na mapepu amabhiibhi, uwamwabho kulonga indongo impwa, uwamwabho kwilulanya indongo ziniizyo.

¹¹ Ziniizyo zyonti mbombo zya Mupepu wunwuyoy weeka, we akuumupa umuntu weeka weeka ishikunjilwa ishileganu anza she ayiganile wuyoy.

Umabhili weeka impaaswa inyinji

¹² She poope umabhili wuli ni mpaaswa inyinji, impaaswa ziniizyo zyonti mabhili weeka. She zili na kwa Kilisiti.

¹³ Kunongwa ye mwa Mupepu uMufinjile weeka, twenti twozeliilwe mu mabhili weeka. Tubhe twe Bhayahuudi awe twe Bhayunaani, tubhe twe bhatumwa awe tubhe twe bhasatulwe, twenti uMlungu atwitiye uMupepu uMufinjile weeka.

¹⁴ Umabhili wutali ni mpaaswa yeeka, lyoli wuli ni mpaaswa inyinji.

¹⁵ Inga ishinama shikuti, "Kunongwa ye ine te ne nyoothe, te ne wa mabhili," bhuli, liniilyo lingashibhikha shitabhe sha mabhili? Ndaali.

16 Lyope ikutwe inga likuti, “Kunongwa ye ine te ne lyiso, te ne lya mabhili,” bhuli, liniilyo lingalibhiikha litabhe lya mabhili?

17 Inga umabhili wonti wubhanje lyiso, umuntu angakhola bhuliibhuli kwimvwa? Awe inga umabhili wonti wubhanje likutwe, umuntu angakhola bhuliibhuli kupingula?

18 Heelo anza she yili uMulungu azibhatishile impaaswa zya mabhili anza she ayiganile wuuyo.

19 Inga vwonti vibhanje mpaaswa yeeka, umabhili nhani wali pooshi?

20 Heelo ishi impaaswa nyinji, lyoli umabhili wali weeka.

21 Ilyiso litangayibhuzya inyoobhe kuti, “Intakukwanza.” Lyope itwe litangavibhuzya ivinama kuti, “Intakubhanza.”

22 Lyoli impaaswa zye zikulolekha kuti ndeganu, zye zikwanziwa nhaani.

23 Khabhili impaaswa zye zikulolekha kuti zitali nu lushindikho, zye tukuzishindikha. Zyope impaaswa zye zikulolekha kuti te nyinza, zye tukuzisunga nhaani,

24 ileelo impaaswa izyi togo, zitakwanziwa kuzisunga nhaani. uMulungu azibhiishile peeka impaaswa, khabhili azipiye ulushindikho nhaani zye zitali nu lushindikho.

25 Abhombile shiniisho, inga kutabhe kugabhunhana mu mabhili, lyoli impaaswa zyonti zyavwanaje ku wulingaanu, sheeka sheeka ku shamwabho.

26 Inga impaaswa yeeka yavwalala, zyonti zikavwalala peeka nayo. Khabhili impaaswa

yeeka inga yabha nu lushindikho, zyonti zikubha nu laseshelo peeka nayo.

²⁷ Ishi, imwe mwe mubhili wa Kilisiti, weeka weeka wiinyu mpaaswa mu mubhili wunuwuwo.

²⁸ Umulungu abhiishile mu shibhanza abha kwanda, bhasundikwa, abha wubhili bhakuwi, abha wutatubhamanyizyi, na bhe bhakubhomba amayeke, bhe bhali ni vikunjilwa ivwa kaponia, bhe bhali ni vikunjilwa ivwa kwavwana, bhe bhali ni vikunjilwa ivwa kulongozya, na bhe bhali ni vikunjilwa ivwa kulonga indongo impwa.

²⁹ Bhali, bhonti bhasundikwa? Bhonti bhakuwi? Bhonti bhamanyizyi? Bhonti bhakubhomba amayeke?

³⁰ Bhonti bhali ni vikunjilwa ivwa kaponia? Bhonti bhakulonga indongo impwa? Bhali, bhonti bhakwilulanya indongo ziniizyo? Ndaali!

³¹ Ishi muyikungule kwanza ivikunjilwa ivipiti. Khabhili intibhalanje idala lye lyanza nhaani kushila ziniizyo zyonti.

13

Ulugano

¹ Poope ingalonga ku ndongo izya bhantu ni zya bhakhabhizya, ileelo inga intali nu lugano, inkubha ngati shongo shi debe lye litali na khantu awe ishongo ishi jomvu.

² Khabhili poope inga inkufumwa uwukuwi na kuziyaganya zyonti zye zili kukwilu nu wumanyi wonti, poope ingabha nu lwitikho ulapiti

ulwa kusaamwa amagamba, ileelo inga intali nū lugano, yitakwavwa naakhamu.

³ Khabhili inga naafumwa ishūuma shaani shonti kuubhapa abhapiina, khabhili inga naafumwa umubhili waani kuti wupwe mu mwoto, inga intali nū lugano, intakukhaaga naakhamu.

⁴ Ulugano lukujimbiilila, ulugano lukwavwa, ulugano lutali nū mwone, ulugano lutali na mabaado, khabhili lutali na malali.

⁵ Ulugano lali nu wusunde, ulugano lutakwanza kuyikhondezya, lutakuvitwa nalubhilo, khabhili ulugano lutakubhaazya imbiibhi.

⁶ Ulugano lutakuseshela imbiibhi, lyoli lukuseshela uwanalyoli.

⁷ Ulugano lukujimbiilila zyonti, lukwitikha izya Mulungu akhabhalilo khonti, lukusubhila zyonti, khabhili lukuyisinda ku zyonti.

⁸ Ulugano lutakusila naalumo. Ieelo ivikunjilwa ivinji vikhayisila, anza kufumwa uwukuwi, na kalonga indongo impwa, nu wumanyi.

⁹ Kunongwa ye tumanyile mashe, khabhili tukufumwa uwukuwi wushe.

¹⁰ Ieelo we winza uwukwilanu, gaala ge gali mashe gakhayisila.

¹¹ We ne mwana, inhalongaga anzū mwana, inhamanyaga anzū mwana. Ieelo ishi kunongwa ye ne muntu umusongo, izya shaana inzileshile.

¹² Kunongwa ye ishi tukulola ishifwani anzi sha mu shilolelo, ileelo mu khabhalilo khaala tukhayilola apazelu. Akhabhalilo ikha imany-

ile mashe, akhabhalilo khaala inhayimanya akhinza anza she uMlungu amanyile ine.

¹³ Pe shiniisho, kuli amazwi gatatu ge te gakhaashile naalumo: ulwitikho, ulusubhilo nū lugano. Ileelo ipiti nhaani ku ganaago gatatu lugano.

14

Ivikunjilwa ivwa kulumbiilila na kulonga indongo impwa

¹ Mulongolwaje nū lugano na kwanza nhaani ivikunjilwa ivwa Mupepu uMufinjile, inhaani ishikunjilwa isha kufumwa uwukuwi.

² Kunongwa ye umuntu we akulonga indongo impwa, atakulonga na bhantu, lyoli akulonga nū Mlungu, kunongwa ye ataliipo we akuziyaganya zye akulonga. Umuntu wanūyo akulonga izya kukwilu mū mwoyo waakwe.*

³ Ileelo we akufumwa uwukuwi, akulonga na bhantu amazwi aga kubhagomwa mū lwitikho, aga kubhakhobhosya na kubhajinjizya umwoyo.

⁴ We akulonga indongo impwa, akuyigomwa wūyo mū lwitikho lwakwe, ileelo we akufumwa uwukuwi akugomwa ishibanza.

⁵ Ine inkwanza imwe mwenti mulongaje indongo impwa, inhaani inkwanza mufumwaje uwukuwi. Kunongwa ye umuntu we akufumwa uwukuwi mapiti kushila we akulonga indongo

* **14:2 14:2** Akulonga izya kukwilu mū mwoyo waakwe Bhamu bhilulanyiinye bhatili, atakulonga ku makha ga Mupepu intumi zye zili kukwilu.

impwa. Lyoli inga aliipo umuntu we akwilulanya zye akulonga, ishibhanza shikukula mu lwitikho.

⁶ Ishi bhanholo bhaani mu lwitikho, inga ninza kukwinyu na kulonga indongo impwa, intibhaavwe akhooni? Intangabhaavwa naakhamu. Lyoli inga nabhaleetela zye uMlungu aniguliye, awe uwumanyi, awe uwukuwi kufuma kwa Mlungu, awe imanyizyo zimo panaapo pe ingabhaavwa.

⁷ Poope ivintu vve vitali nu wuumi, anzi mfwilimbo, awe ishinanda, we vikukuta, bhuli, umuntu angalumanya bhulibhuli ulwimbo lwe lukwimbwa inga kutali nu wuleganu uwa mazi?

⁸ Inga ikakaavu likukuta izi lye litakumanyisa ku bhantu, wu naanu we angayilingaanya kulwa ibho?

⁹ She zili na kukwinyu, inga ulumili lwinyu lukulonga zye zitakumanyikha, wu naanu we angazyaganya zye mukulonga? Amazwi giinyu gatiteje mu mpepu.

¹⁰ Mu nsi muli indongo inyinji, ilelo yitaliipo ngayeeka ye yitakumanyikha.

¹¹ Shiniisho inga intakuyaaganya indongo ye akulonga umuntu umo, inkubha ne mujeni kukwakwe, wope akubha mujeni kukwani.

¹² Shiniisho nimwe, kunongwa ye mukwanza nhaani kubha ni vikunjilwa ivwa Mupepu uMufinjile, mayikungule nhaani kubha ni vikunjilwa vve vikukuzya ishibhanza.

¹³ Pe shiniisho, umuntu we akulonga indongo impwa, amulaabhe uMlungu aamupe uwumanyi uwa kwilulanya.

14 Kunongwa ye inga napuuta ku ndongo impwa, umwoyo waani we wukupuuta, ileelo injeele yaani yitakupata naakhamu.

15 Imbombe lyoni? Intipuutaje mu mwoyo waani, khabhili intipuutaje ku njeele zyani. Intiyimbe mu mwoyo waani khabhili intiyimbe ku njeele zyani.

16 Inga ukumusalifwa uMulungu ku mwoyo waakho, umuntu we atakuziyaganya zye ukulonga, inga ali pa lubhangaano, angakhola bhuliibhuli kwitishila impuuto zyakho izya kusalifwa kuti, "Zibhe shiniisho"?

17 Kukwakhoh impuuto izya kumusalifwa uMulungu zikubha nyinza, ileelo kwa muntu uwunji zitangamugomwa mu lwitikho.

18 Inkumusalifwa uMulungu kunongwa ye ine inkulonga ku ndongo impwa kubhashila mwenti.

19 Ileelo mu shibhanza inkuyigana nhaani kulonga amazwi gasaanu ge gakumanyikha ku njeele inga imbamanyizye abhanji, na kuti indonje amazwi ielufu ishumi mu ndongo impwa.

20 Bhanholo bhaani mu lwitikho, mutasiibhaje anza bhaana, ileelo kusiibha kwinyu mubhe anza bhantu bhe bhagomile. Lyoli ku zyi mbiibhi, kwashi mubhe anza bhaana abheela.

21 Yisimbiilwe mu Wusimbe uWufinjile kuti,
 "UMwene akulonga akuti,
 'Inhayilonga na bhantu ibha
 kushilila ku bhantu abhi ndongo iyinji,
 na ku malomu ga bhantu abhajeni,

poope shiniisho te bhakhantejeelezye.’ ”†

22 Pe shiniisho, kulonga ku ndongo impwa shiholesyo, te ku bhe bhitishile lyoli ku bhe bhatitishile. Heelo kufumwa uwukuwi shiholesyo te ku bhe bhatitishile, lyoli ku bhe bhitishile.

23 Ishi inga bhe bhitishile bhabhunganile kupuuta mu shibhanza, bhonti bhande kulonga indongo impwa, ileelo inga bhinjila abhantu abhajeni, awe bhe bhatitishile, bhuli bhatangati mali ni shilaalusi?

24 Heelo inga mweni mukufumwa uwukuwi, ayinjila umuntu we mujeni, awe we atitishile, zyonti zye akwimvwa zitimwavwe kumanya imbiibi zyakwe. Khabhili zyonti zye ayimvwa zitimulonje.

25 Zye zili mu mwoyo waakwe, zikubha apazelu. Pe atisugamile na kumupuuta uMulongu kuti, “Nalyoli uMulongu ali peka niimwe!”

Uhubhaatikho ulwa Bhakilisiti kupuuta

26 Bhanholo bhaani mu lwitikho, tulonge tuti bhuli? We mubhunganile peeka, umo akwimba ulwimbo, uwamwabho akumanyizya, uwamwabho akwilulanya, uwamwabho akulonga indongo impwa, uwamwabho akwilulanya zye zikulongwa. Ziniizyo zyonti zibhombekhaje kukuzya ishibhanza.

27 Inga bhaliipo bhe bhakulonga indongo impwa, bhalongaje bhabhili awe bhatatu, bhatakhonjele, khabhili bhalongaje weeka

† 14:21 14:21 Bhaazya Yeesaya 28:11-12.

weeka, ileelo abhanje umuntu ũwa kwilulanya zye bhakulonga.

²⁸ Ileelo inga ataliipo ũwa kwilulanya, we akulonga indongo impwa aleshe kulonga pa shibhanza, lyoli alongaje mũ mwoyo waakwe nũ Mũlungũ.

²⁹ Bhoope bhe bhakufumwa uwukuwi, bhafumwaje bhabhili awe bhatatũ, bhamu bhasimishizyaje amazwi ganaago.

³⁰ Inga weeka mũ bhe bhakutejeelezya lyamwinzila izwi ilya kulonga kufuma kwa Mũlungũ, we akũmbĩĩlila apũũme.

³¹ Kwi dala liniilyo imwe mweni mũngakhola kufumwa uwukuwi kwi dala ilya kũposhelezanya, inga mweni mũmanyile na kũgoma.

³² Kũnongwa ye ishikũnjilwa isha wukuwi, shikũtabhaalwa na bhe bhakufumwa uwukuwi.

³³ ƳMũlungũ wiitũ te wa mũyũbhano, lyoli wa wutengaanu.

Anza she zili mũ vibhanza vwonti iwũa bhafinjile bha Mũlungũ,

³⁴ abhantanda bhapũũmaje mye mũ shibhanza. Kũnongwa ye bhatakwiitishilwa kulonga, lyoli bhatinikhaje anza she yikulonga indajizyo ya Moose.

³⁵ Inga bhakwanza kũbhũziilizya limo, bhabhũziilizyaje abhalũme bhaabho mu nyumba, kũnongwa ye zyi nsoni mũwantanda kulonga mũ shibhanza.

³⁶ Bhũli, izwi lya Mũlungũ lyáfumile kukwinyu, awe mwemwe mũbheene mwe izwi libhafishiye?

³⁷ Inga umuntu akuyilola kuti ali ni shikunjilwa isha wukuwi, awe ali ni vikunjilwa ivwamwabho ivwa Mupepu uMufinjile, pe ayiitische kuti zye inkubhasimbila ndajizyo kufuma kwa Mwene uYeesu.

³⁸ Heelo inga umuntu we akushoolanya ganaaga, woope bhamusholanyaaje.

³⁹ Pe shiniisho bhanholo bhaani mu lwitikho, mwanzaje nhaani kufumwa uwukuwi, ileelo mutamukhaanaje umuntu kulonga indongo impwa.

⁴⁰ Heelo zyonti ziniizi zibhombekhaje ku winza, khabhili ku lubhaatikho.

15

Kuzukha kwa Kilisiti

¹ Ishi bhanholo bhaani mu lwitikho, inkubhakumbusya iNtumi iNyinza zye nabhalumbiliye, nimwe mukhaziposheela, ishi zye zikubhabhikha kubha nu lwitikho lwe mali nalwo.

² Ku Ntumi iNyinza ziniizi makuwaaga uwu-poshi inga mukulema ku wusimishizu izwi liniilyo lye nalumbiliye. Lyoli inga mutakulema, ulwitikho lwinyu lutakwawwa.

³ Ine nabhamanyiziize imanyizyo impiti zye naposheleeye, kuti uKilisiti afuuye kunongwa yi mbiibhi zitu, anza she uWusimbe uWufinjile wakulonga.*

* 15:3 15:3 Bhaazya Yeesaya 53:5-12.

4 Khabhili yisimbiilwe mu Wusimbe uWufinjile kuti akhasiyilwa, isiku ilya wutatũ akhazyakha.†

5 Akhayilolesya kwa Keefa, iwinza akhayilolesya ku bhasundikwa bhaakwe ishumi na bhabhili.

6 Pilongolela, akhayilolesya ku bhanholo mu lwitikho imia zisaanu (500) bhe bháamile peeka. Abhinji mu bhanaabho nu musanyuunu bhumu, she poope bhamu bhakhafwa.

7 Pilongolela, akhayilolesya kwa Yaakobo, iwinza akhayilolesya ku bhasundikwa bhonti.

8 Kũwumalilishilo we ayilolesya ku bhonti, akhayilolesya kukwani, ine ne ngati nápapiilwe we akhabhalilo khashiili kufikha.

9 Kũnongwa ye ine ne muni mu bhasundikwa, ne intakhondeeye poope kũbhilishilwa kuti musundikwa, kũnongwa ye náshiyimvwizye ishibanza sha Mulungu.

10 Heelo ku wiila wa Mulungu, indi shiniishi she indi. Uwiila waakwe kukwani wátámile wa khasa. Lyoli nábhombile imbombo kushila abhasundikwa bhonti. Intámile neene, lyoli wámile wiila wa Mulungu we wámile peeka niine.

11 Shiniisho imbe neene inkulumbiilila, awe abhasundikwa abhanji, shiniisho she tukulumbiilila intumi, na she mwitishile.

Kũzyakha ku bhafwe

12 Ishi inga uKilisiti akulumbiililwa kuti ázyushile kufuma ku bhafwe, bhaliibhali bhamu

† 15:4 15:4 Bhaazyu Zabuuuli 16:8-10.

mukaasi yiinyu bhakuti kutaliipo kuziyukha abhafwe?

¹³ Inga kutaliipo kuziyukha abhafwe, pe uKilisiti woope atazyushile.

¹⁴ Khabhili inga uKilisiti atazyushile kufuma ku bhafwe, kulumbiilila kwitu kwa khasa, lwope ulwitikho lwinyu lutakwavwa.

¹⁵ Peeka na shiniisho, itwe tukulolekha kuti twe bhakeeti bhi lenga abha Mulungu, kunongwa ye tukusimishiza kuti uMulungu amuzusiize uKilisiti kufuma ku bhafwe. Heelo liniilyo litangabha lya nalyoli inga abhafwe bhatakuziyukha.

¹⁶ Kwe kuti inga abhafwe bhatakuziyukha, woope uKilisiti atazyushile.

¹⁷ Khabhili inga uKilisiti atazyushile, ulwitikho lwinyu lutibhe lwa khasa, lyoli mutibhe she mali mu mbiibhi zinyu.

¹⁸ Bhoope bhe bhafuuye we bhamwitishile uKilisiti, bhateejile.

¹⁹ Inga ulusubhilo lwitu kwa Kilisiti lali kunongwa iya wiikhalo uwa shiishi weene, ipo tukubha twe bhapiina kushila abhantu bhonti.

²⁰ Heelo uwanalyoli we wu wuwu: uKilisiti azyushile kufuma ku bhafwe, uweene we wa kwanda kuziyukha ku bhe bhafuuye.

²¹ Kwe kuti anza she uwufwe winzile kufumilana nu muntu weeka, shiniisho kwopo kuziyukha ku bhafwe kwinzile kufumilana nu muntu weeka.

²² Kunongwa ye anza she abhantu bhonti bhakufwa kufumilana nu Adamu, shiniisho abhantu bhonti bhakhayiziyukha kufumilana nu

Kilisiti.

²³ fleelo weeka weeka uMulungu akhayimuziyasya ku khabhalilo khaakwe khe abhiishile. UKilisiti we atalile kuziyukha, pilongolela bhakhayiziyukha abhantu bhaakwe akhabhalilo khe akhayinza.

²⁴ Ipo pe uwumalilishilo wakhayinza, pe uKilisiti akhayimupa uMulungu uTaata uwumwene waakwe, we aayazyu uwumwene wonti na makha gonti na bha waamulo bhonti.

²⁵ Kunongwa ye shigane sha Mulungu kuti uKilisiti atabhaale paka abhatole abhalugu bhaakwe na kubhabhikha paasi pa waamulo waakwe.‡§

²⁶ Umulugu uwa kuwumalilishilo kumuyazyu wufwe.

²⁷ Kunongwa ye uWusimbe uWufinjile wakuti, “Akhayivibhikha ivintu vwonti paasi pa waamulo waakwe.” fleelo uWusimbe we wukulonga shiniisho, te kuti uMulungu wope akhayibha paasi pa waamulo wanuwu, kunongwa ye uweene we avibhiishile vwonti paasi pa waamulo wa Yeesu.*

²⁸ We akhayivibhikha ivintu vwonti paasi pa waamulo wa Kilisiti, pe wope umwana akhayibha paasi pa waamulo wa Mulungu we avibhiishile ivintu vwonti paasi pa waamulo wa

‡ 15:25 15:25 *Kubhabhikha paasi pa waamulo waakwe Mu ndongo iya Shiyunaani yikuti kubhabhikha paasi pa vinama vwakwe.* § 15:25 15:25 *Bhaazyu Zabuuuli 110:1.* * 15:27 15:27 *Bhaazyu Zabuuuli 8:6.*

Mwana waakwe,[†] inga uMulungu abhe Mupiti wa vwonti.

29 Khabhili abhantu bhe bhakwozelwa kunongwa iya bhafwe bhakusubhila khantu khooni? Inga abhafwe bhatakuzyukha, khooni khe abhantu bhakwozelwa kunongwa ya bhafwe?[‡]

30 Nitwe khooni tukuyibhikha insiku zyonti mu khabhalilo akhabhiibhi nhaani?

31 Bhanholo bhaani, uwufwe wuli papiipi niine insiku zyonti. Liniili lye likumbikha kuti injibaade kunongwa yiinyu kwi dala ilya kupatinhanywa nu Yeesu Kilisiti uMwene wiitu.

32 Inga insiibho yaani yibhanje ya mu nsi, kulwa kwani ni vikhanu ivikhali mu Efeeso kwamile kunaavwe akhooni? Inga abhafwe bhatakuzyukha,

“Pe tulyanje, tumwelaje,

kunongwa ye indaabhi tukhayifwa.”§

33 Mutakhakhopelwe na bhantu bhe bhakulonga shiniisho, kunongwa ye “Uwumanyani na bhantu abhabhiibhi, wukunanganya injendo inyinza.”

34 Muzibhombelaje injeele anza she yikwanziwa, mutakhasheelee kubhomba imbiibhi, kunongwa ye bhamu mukaasi yiinyu

[†] 15:28 15:28 *Umwana waakwe* Bhaazyu **uMwana wa Mulungu** mu **Wilulanyo uwa mazwi amajeni.** [‡] 15:29

15:29 *Abhantu bhakwozelwa kunongwa ya bhafwe* Akhabhalilo khe lyasimbilwe ikalaata ili, kwamile ni mwata iya Mukilisiti kwozelwa kunongwa ya wamwabho we afuuye sita kwozelwa.

§ 15:32 15:32 Bhaazyu Yeesaya 22:13; 56:12.

bhatamumanyile uMlungu. Inkulonga ziniizyo inga imbasupizye.

Umabhili she wakhayibha isiku ilya kuzyukha

³⁵ Heelo umuntu angakhola kubhuzilizya kuti, “Abhafwe bhakuzyukha bhuliibhuli? Bhakhayibha na mabhili we wali bhuliibhuli?”

³⁶ Imwe mabhalema! We mwawaala imbeyu, yitangamela sita kufwa.

³⁷ Vwe mukawaala mbeyu, yibhe ngano awe imbeyu izinji, yitakukholana ni shimela she shikukula.

³⁸ Heelo uMlungu akuuyipa imbeyu ishimela she akwanza wuuyo, imbeyu yeeka yeeka akuuyipa ishimela shaakwe.

³⁹ Amabhili ga vipelwa vwonti gatali ishikholo sheeka. Abhantu bhali na mabhili ishikholo sheeka, ivikhanu vili na mabhili ishikholo ishileganu. Zyoze inyonyi ni nswi zili na mabhili ishikholo ishileganu.

⁴⁰ Khabhili galiipo amabhili aga kumwanya na mabhili aga mu nsi. Heelo uwinza uwa mabhili aga kumwanya wunji, nu winza uwa mabhili aga mu nsi wunji.

⁴¹ Izubha lili nu winza we wuyikholile, umwezi wali nu winza we wuyikholile ni nzota zili nu winza we wuyikholile. Zyoze inzota, yeeka yeeka yili nu winza we wuyikholile.

⁴² She zili ku zya kuzyukha abhafwe. Anzi mbeyu, umabhili we wakusyilwa mu lusuto wakubhola, ileelo wuula we uMlungu akhayiwuzysya watakubhola.

43 Umubhili wakusylwa kwi dala ilya kuwushoolanya, ileelo uMulungu akuwazyasya ku wumwamu. Umubhili wakusylwa ku watolwe, ileelo uMulungu akuwazyasya wakubha wa makha.

44 Umubhili we wakusylwa wa mu nsi, ileelo we uMulungu akuwazyasya wakubha mubhili we wakulongolwa nu Mupepu uMufinjile. Kuli nu mubhili uwa mu nsi, kakhayibha nu mubhili we wakulongolwa nu Mupepu uMufinjile.

45 Yisimbiilwe mu Wusimbe uWufinjile kuti, “Umuntu uwa kwanda uAdamu, apeliilwe, akhabha muntu umwumi.”* ileelo uAdamu uwa kuwamalilishilo Mupepu we akubhapa abhantu uwuumi.

46 Umubhili uwa kuwandilo we mubhili wa mu nsi, pilongolela wakwinza umubhili we wakulongolwa nu Mupepu uMufinjile.

47 Umuntu uwa kwanda afumile mu nsi, apeliilwe kufuma mu lusuuto, umuntu uwa wubhili afumile kumwanya.

48 Anza she tukholiine nu Adamu uwa mu nsi, she tukhayikholana nu Adamu uwa kumwanya.

49 Anza she tukholiine na we apeliilwe kufuma mu lusuuto, she tukhayikholana na we afumile kumwanya.

50 Bhanholo bhaani mu lwitikho, inkulonga inkuti, umubhili ni bhanda vitangakhola kwinjila mu wumwene wa Mulungu. Khe khakubhola khatangakhola kubha nu wuumi uwa wiila na wiila.

* 15:45 15:45 Bhaazy Wandilo 2:7.

51 Tejeelezyi, inkubhabhuzya izya kukwilu: itwe twenti te tukhaafwe, lyoli twenti uMulungu akhayitugalulanya.

52 Nalubhilo kuzinziila na kudaamula, ikakaavu ilya kumpeleela we lyakuta, abhafwe bhakhayizyukha na mabhili ge gatakubhola, nitwe uMulungu akhayitugalulanya.

53 Kunongwa ye umabhili uwu we wukubhola yikuti wugalunhane wubhe mabhili we wutakubhola, wope umabhili we wukufwa yikuti wugalunhane kubha mabhili we wutakufwa.

54 Pe umabhili uwu we wukubhola inga wagalunhana kubha mabhili we wutakubhola, wope umabhili we wukufwa inga wagalunhana kubha mabhili we wutakufwa, pe likhayikwila izwi lye lisimbiilwe mu Wusimbe uWufinjile kuti, "Uwufwe waatolwa nziila!"†

55 "Iwe wufwe, kuli kwoshi kutola kwakho? Gali kwoshi amakha gaakho aga mavune?"‡

56 Imbiibhi zye zikuleeta amavune aga wufwe, khabhili indajizyo zye zikutulanga amakha agi mbiibhi.

57 Ileelo tumusalifwaje uMulungu we akuu-tupa kutola kwi dala ilya Mwene witu uYeesu Kilisiti.

58 Pe shiniisho bhanholo bhaani abhaganwa mu lwitikho, muyisinde, mutayingaanaje. Mujendeelele kuyikungula kubhomba imbombo ya Mwene, kunongwa ye mumanyile kuti, imbombo yiinyu te ya khasa mwa Mwene.

† 15:54 15:54 Bhaazya Yeesaya 25:8. ‡ 15:55 15:55 Bhaazya Hoseeya 13:14.

16

Insaangu iya kubhaavwa aBhakilisiti

¹ Ishi, kunongwa iyi nsaangu iya kubhaavwa abhantu bha Mulungu, mubhombaje anza she navihajiziizye ivibhanza ivwa mu Galatiya.

² Isiku ilya Pamulungu, umuntu weeka weeka mukaasi yiinyu agabhulaje inhela kulandatana na she apatile, inga we ninza kukwinyu, kutakhabhe ni mbombo iya kusangulizya.

³ We ninza kukwinyu, inhayibhasonteelezya na makalaata aga kubhamanyisya bhaala bhe mukhayibhasebha mukaasi yiinyu kuti bhatwale insaangu zyinyu ku Yelusaleemu.

⁴ Inga yalolekha kuti niine imbale, ipo pe bhakhayishuula peeka niine.

Uhubhaatikho lwa Paulo kubhala ku Kolinso

⁵ We nashilila ku Makedoniya, inhayinza kukwinyu, kwe kuti inkusubhila kushilila ku Makedoniya.

⁶ Pamu inhayikhala kukwinyu akhabhalilo khashe, awe lumo inhayikhala peeka nimwe akhabhalilo khonti akhi mpepu inga mukhamfumwizye ivintu ivwa kunaavwa, injendeelele kushuula kwonti kwe inkubhala.

⁷ Kunongwa ye intayiganile kukhomaana nimwe akhabhalilo khashe na kujendeelela kushuula. Inga uMwene ayigana, inkusubhila kwikhala kukwinyu akhabhalilo akhatali.

⁸ Ileelo intiyikhale mu nhaaya ini iya mu Efeeso paka kufikha pi siku ilyi Pentekoositi.

⁹ Kunongwa ye uMulungu aniguliye umulyango uwa kubhomba imbombo impiti

mū nahaaya ini, ileelo bhaliipo abhantu abhinji bhe bhakundindanjila.

¹⁰ UTiimoti inga ayinza kukwinyu, mukhamuposheelaje ayikhalaje akhinza sita lyoga, kunongwa ye wope akubhomba imbombo ya Mwene anziine she inkubhomba.

¹¹ Pe shiniisho, umuntu wowonti atakhamushoolanye. Lyoli mukhamwawwe ajendeelele kushuula ku wutengaanu, inga agalushe kukwani. Kunongwa ye ine inkumugulila peeka na bhamwitu bhe bhitishile.

¹² Ileo ku zya nholo witu mu lwitiko uApoolo, imulambile nhaani kuti ayinze kukwinyu peeka na bhe bhitishile abhamwabho. Ileo uweene atayiganile kwiza akhabhalilo ikha, lyoli akhayinza we abha na khabhalilo.

Amazwi aga kummalilishilo peeka ni ndajilo

¹³ Mubhe amiiso, muyisindaje mu lwitiko, khabhili mubhanje mwe bhadandamazu na kubha na makha.

¹⁴ Zyonti zye mukubhomba, mubhombaje mu lugano.

¹⁵ Imwe mumanyile kuti uSiteefana peeka na bhantu abha mu nyumba yaakwe, bhantu bhe bhámile bha kwanda kumwitikha uYeesu Kilisiti mu mukoa uwa Akaaya. Khabhili bhayifumwizye kubhaavwa abhafinjile bha Mulungu. Ishi bhanholo bhaani mu lwitiko inkubhalamba,

¹⁶ mubhatinikhaje abhantu anza bhanaabho, na wowonti we akuyifumwa na kuyimba kubhomba imbombo peeka nabho.

17 Inkuseshela nhaani we inkulola kuti uSi-teefana, uFilitunaato, nu Akayiko, bhinzile, bhambombeeye inyinji zye mutangabhomba kunongwa ye mutali peeka niine.

18 Bhanjinjiziizye umwoyo waani, na mooyo giinyu. Mubhakumbukhaje nhaani abhantu anza bhanaabho.

19 Ivibhanza vwonti ivwa mu mukoa uwa Asiya vikubhalamukha. Uakiila nu Pulisika, peeka ni shibhanza shonti she shikukhomaana mu nyumba yaabho, bhakubhalamukha kwi taawa lya Mwene.

20 Abhanholo bhonti mu lwitikho abha piipa, bhakubhalamukha. Mulamunhanaje ku lugano ulwa nalyoli.

21 Ine nuPaulo, inkusimba indamukho izi ni nyoobhe yaani nuneene.

22 Umuntu wowonti we atamuganile uMwene, agunwe. Mwene wiitu uyinze!

23 Uwiila wa Mwene uYeesu wubhe peeka niimwe.

24 Ulugano lwani lubhe kukwinyu, imwe mwe mupatinhiine nu Yeesu Kilisiti.

**ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 28 Dec 2024 from source
files dated 29 Jan 2022

3aa8e7a3-f258-5182-ab3f-fbc6f725bb06